

Singa Yehuda

Kisah Yesus Kristus Menurut Injil Markus



Penerbitan Kristian

Anda mendapat buku **Singa Yehuda**
dengan harga hanya **RM 2.00** ini adalah
kerana berkat dari gereja dan individu Kristian
yang telah memberi bagi menjayakan kempen
Setiap Murid Kristian adalah Murid Kristus

Singa Yehuda

Kisah Yesus Kristus
Menurut Injil Markus

Dihadiahkan kepada:

Nama: _____

Pada: _____

Oleh: _____

"Setiap Murid Kristian adalah Murid Kristus"

Singa Yehuda

Kisah Yesus Kristus Menurut Injil Markus

Diterbitkan oleh:

Scripture Union Sabah & Scripture Union Sarawak
(dengan kerjasama Wawasan Penabur Sdn Bhd)

P. O. Box : 1099

93722 Kuching

Sarawak, MALAYSIA

komik.singa.yehuda@gmail.com

Petikan Alkitab diambil dari:

Alkitab Versi Borneo © 2016, LAB Network

Cetakan Pertama : September 2017

Dicetak di Malaysia.




Sama-sama kita menjayakan
Kempen “Setiap Murid Kristian adalah Murid Kristus”
untuk melahirkan generasi pelapis Gereja di Malaysia
yang lebih mengenal, mencintai dan meneladani
Yesus Kristus yang adalah Jalan, Kebenaran dan Hidup.

Scripture Union Sabah, Scripture Union Sarawak dan Wawasan Penabur bekerja rapat dengan gereja-gereja lintas denominasi di Sabah dan Sarawak untuk menerbitkan dan mengedar bahan-bahan sumber pemuridan Kristian dalam Bahasa Malaysia yang berasaskan Alkitabiah bagi kegunaan gereja dan umat Tuhan. Buku ini adalah satu usaha penerbitan bersama untuk menguatkan iman para pelajar Kristian di Malaysia.

Copyright Willem de Vink© 1993
Stichting Wereldtaal, Houten, The Netherlands.
(dari buku bergambar dalam Bahasa Belanda, “Jezus Messias”)

Hakcipta© 2017 Scripture Union Sabah, Scripture Union Sarawak
& Wawasan Penabur

Hakcipta Terpelihara. Tidak dibenarkan mengeluarkan mana-mana bahagian artikel, ilustrasi, dan isi kandungan buku ini dalam apa juga bentuk dan dengan cara apa juga sama ada secara elektronik, fotokopi, mekanik, rakaman atau cara lain sebelum mendapat izin bertulis daripada Penerbit.



Pengenalan

Shalom! Dalam tangan anda sekarang adalah sebuah buku yang mengagumkan, **Singa Yehuda**, cerita tentang Yesus Kristus seperti yang tercatat dalam Injil Markus. Komik **Singa Yehuda** ini bukan hanya sekadar Injil Markus yang berilustrasi, tetapi adalah bertujuan menarik perhatian pembaca untuk tetap yakin dan percaya, bahawa Alkitab adalah Firman Allah yang hidup. Perkataan-perkataan di dalamnya mampu mengubah hidup semua orang, sama ada kanak-kanak kecil, remaja ataupun orang dewasa!

“Firman Allah hidup dan berkuasa, lebih tajam daripada pedang dua mata, menembusi ke garis pemisah nyawa dan roh, sendi dan sumsum, serta mengenal antara fikiran dan niat dalam hati.” (Ibrani 4:12)

“Firman Tuhan kekal selama-lamanya” (1 Petrus 1:25)

Doa kami adalah semoga buku ini akan membantu kita memahami, mengingati dan menerapkan pengajaran Yesus dalam kehidupan kita. Sama seperti doa Yesus kepada Bapa untuk kita semua, “Sucikanlah mereka dengan kebenaran-Mu; Firman-Mu adalah kebenaran.” (Yohanes 17:17)

Kenapa Singa Yehuda?

Secara tradisi, singa bersayap adalah lambang kepada Markus kerana Injilnya bermula dengan Yohanes Pembaptis, “satu suara berseru di gurun” (Markus 1:3) yang dikatakan seperti bunyi auman singa. Singa juga merupakan satu lambang kerajaan diraja, dan Markus menceritakan darjat diraja Yesus.

“Singa Yehuda” adalah salah satu gelaran untuk Yesus. Janji Allah kepadanya dinubuat ketika Yakub memberkati anaknya yang keempat, “Yehuda, kamu laksana seekor singa...cokmar kuasa tidak akan berpindah daripada Yehuda, mahupun tongkat kerajaan daripada di antara kakinya, hingga datang Dia yang berhak atasnya; kepadanya lah bangsa-bangsa akan tunduk.” (Kejadian 49:9a, 10).

Satu hari nanti, apabila Yesus kembali untuk kali kedua sebagai Hakim dunia, Wahyu 5:5 menyatakan, “Lihatlah! Singa daripada suku Yehuda, Tunas Daud, telah menang. Dia dapat membuka gulungan naskah itu dan memecahkan tujuh materai dan membuka gulungan naskah itu.” Anak Domba yang bersemayam di sebelah kanan Yang Maha Kuasa itu layak menerima kekuasaan, kekayaan, kebijaksanaan, kekuatan, kehormatan, kemuliaan dan puji-pujian (Wahyu 5:12) kerana “dengan darah kematian-Mu Engkau telah menebus untuk Allah manusia daripada segala suku, bahasa, kaum, dan bangsa. Engkau telah menjadikan mereka suatu kerajaan dan imam-imam Allah untuk menyembah Allah kita dan memerintah di bumi.” (Wahyu 5:9-10)

Markus adalah Injil pertama yang ditulis antara tahun Masihi 60 dan 70. Ia ditulis dengan terperinci yang tidak tercatat dalam tiga Injil yang lain, dan ia bergerak dengan cepat, seperti sebuah cerita yang hebat, dengan satu peristiwa demi peristiwa yang lain. Dalam Injil Markus, Yesus dan murid-murid-Nya melakukan semua perkara dengan serta-merta dan segera. Mereka bertindak sepantas singa termasuk semasa mereka dalam perjalanan atau keadaan tergesa-gesa.

Walaupun banyak sifat kemanusiaan Yesus ditunjukkan dalam Injil Markus — seperti ungkapan kemarahan-Nya, kesedihan-Nya, dan belas kasihan-Nya — maksud utama Markus adalah untuk mendorong orang Kristian untuk mengenal Yesus sebagai Anak Allah, Sang Penyelamat (Mesias), dan untuk membantu mereka untuk tetap teguh dalam iman mereka semasa menghadapi penganiayaan dan ancaman lain. Dia mahu para pembacanya memahami apa yang dimaksudkan sebagai menjadi seorang murid Yesus.

Markus si Penginjil sering disebut dalam kitab Kisah Para Rasul. Malah, kita membaca bahawa Markus menemani Paulus dan Barnabas dalam beberapa perjalanan misi mereka. Mungkin semangat dan keberanian Markus serta para rasul dalam perjalanan misi mereka, serta tindakan segera, urgensi, dan kemanusiaan dalam tulisannya, telah menegaskan lagi penggunaan singa bersayap sebagai lambang Injil Markus.

Sebelum Anda Bermula



1. Mulakan dengan berdoa,

“Bapa yang di Syurga, terima kasih kerana Engkau telah menganugerahkan Anak-Mu yang tunggal, Yesus. Saya akan mula membaca tentang Dia. Bantulah saya untuk memahami perkataan-perkataan-Nya dan merasakan kasih-Nya semasa saya membaca buku ini. Amen”.


2. Rujukan sebenar Alkitab

Rujukan ayat yang terdapat di bahagian atas kanan dan kiri halaman buku menunjukkan ayat-ayat Alkitab yang telah diilustrasikan. Sebagai contoh, Markus 1:40-45 bererti Injil Markus Bab 1 Ayat 40 hingga 45. Pada beberapa halaman anda akan dapati ayat-ayat itu dalam bentuk gelembung ucapan dengan latar belakang putih.



3. Kutipan dari Perjanjian Lama

Ini ditunjukkan dengan satu latar belakang kertas kuno, yang menggambarkan ia adalah ayat-ayat yang lama. Ia biasanya mempunyai nama kitab, bab dan ayat supaya anda tahu mereka adalah kutipan dari Perjanjian Lama.



4. Nota Kaki

Catatan atau keterangan lanjutan untuk suatu perkataan atau frasa. Ia didapati di bahagian bawah halaman dengan abjad "n" superskrip yang kecil dalam suatu ayat Alkitab.





5. Pegangan Hidup

Ini adalah nota-nota atau keterangan lanjutan suatu pengajaran atau idea yang boleh membantu anda untuk membuat refleksi, renungan, serta bagaimana kebenaran Firman Allah itu dapat di-

terapkan di dalam hidup anda. Ia ditandai dengan simbol “*” pada ayat.

6. Pautan Iman

Ini adalah nota-nota tentang asas kepercayaan iman Kristian, atau hujah-hujah apolojia untuk mem-bela dan mempertahankan dasar kepercayaan Kristian. Ia ditandai dengan simbol “⚓” dalam suatu ayat.





7. Jalan Penyelamatan

Satu ringkasan tentang ajaran jalan penyelamatan telah disediakan di bahagian akhir buku ini.

8. Doa Pertaubatan

Satu contoh doa pertaubatan bagi mengakui kesalahan (dosa) dan menerima Yesus sebagai Sahabat dan Penyelamat ada disediakan di bahagian akhir buku ini



9. Alamat untuk Dihubungi

Sekiranya anda ingin mengetahui lebih lanjut tentang beberapa hal yang dibincangkan dalam buku ini, anda boleh hubungi alamat yang tertera (jika ada).

Siapakah Yesus Kristus?


Umumnya Yesus dipandang sebagai seseorang yang pernah hidup di Israel sekitar 2,000 tahun yang lalu. Hampir setiap agama besar yang ada di dunia ini berpandangan bahawa Yesus adalah seorang nabi, seorang guru yang baik, atau seorang yang salih. Tetapi Alkitab mengajarkan kepada kita bahawa Yesus lebih dari sekadar seorang nabi, guru yang baik atau orang yang salih. Dia adalah Kristus, Mesias, Penyelamat. Ini bermakna Dia adalah Raja. Namun Dia bukan hanya sekadar seorang Raja. Yesus juga dipanggil “Anak Allah” dan “Anak Manusia”. Ini bererti Dia adalah milik Allah dan manusia. Sejarah kehidupan Yesus digambarkan dalam Alkitab. Ia adalah sebuah kisah teragung sepanjang zaman.



Zaman Yesus

Era kita bermula dengan kelahiran Yesus. Pada zaman itu orang mengembara dengan berjalan kaki atau menunggang keldai, unta, atau kuda. Pada masa itu sebahagian besar bahagian Eropah, Timur Tengah, dan Afrika Utara dikuasai oleh Empayar Rom. Kebanyakan orang pada masa itu tidak pandai membaca atau menulis, namun orang Yahudi di Israel boleh. Mereka dipanggil “Orang Kitab.” Allah berbicara di dalam Kitab Suci, Alkitab. Dia adalah Pencipta segala makhluk dan benda yang ada, dan Dia mahu menjadi sahabat dengan semua orang. Yesus telah menunjukkan semua itu dengan jelas sekali!





Israel di Zaman Yesus

Ibu Negeri: Yerusalem

Daerah-daerah: Galilea, Samaria dan Yudea

Saiz: 28,000 km² (10,810 Batu²)

Iklm: Sub-Tropika

Politik: Israel berada di bawah kekuasaan kekaisaran Romawi sejak 63 Sebelum Masihi

Pemerintah: Pontius Pilatus adalah Gabenor Rom di Israel. Kaisar Tiberius adalah kaisar Romawi di Roma.

Agama: Yahudi. Orang Yahudi mempunyai Bait Suci di Yerusalem. Para imam mengurus segala urusan agama. Mereka yang mengajar kitab-kitab suci dikenali sebagai orang Farisi.

Bahasa: Ibrani (bahasa orang Yahudi), Yunani (bahasa perdagangan antarabangsa), Latin (bahasa orang Romawi)

Daftar Isi

Bab 1

Yohanes	1
Yohanes membaptis Yesus	2
Murid Yesus yang pertama	3
Yesus membentak roh jahat	4
Yesus menyembuhkan ramai orang	5
Yesus mengajar di kota-kota lain	5
Yesus menyembuhkan seorang yang sakit kusta	6

Bab 2

Yesus menyembuhkan seorang lumpuh ..	8
Panggilan Lewi	10
Berpuasa	11
Yesus dan hari Sabat	12

Bab 3

Orang ramai mengikut Yesus	14
Yesus memanggil dua belas rasul	15
Yesus dan Beelzebul	16
Yesus dan saudara-saudara-Nya	17

Bab 4

Ibarat tentang seorang penabur	18
Ibarat tentang pelita	20
Ibarat tentang benih yang tumbuh	20
Ibarat tentang biji sesawi	21
Angin ribut diredakan	22

Bab 5

Yesus menyembuhkan seorang yang dirasuk roh iblis	24
Yesus melakukan mukjizat dan penyembuhan	26

Bab 6

Yesus mengajar di Nazaret	29
Yesus mengutus dua belas murid-Nya ...	30
Yohanes dibunuh	31
Yesus memberi makan kepada lima ribu orang	34
Yesus berjalan di atas air	36

Bab 7

Adat istiadat nenek moyang	38
Iman seorang perempuan Siro-Fenisia ...	40
Yesus menyembuhkan seorang bisu tuli	41

Bab 8

Yesus memberi makan kepada empat ribu orang	42
Ragi orang Farisi dan ragi Herodes	44
Yesus menyembuhkan seorang buta	45
Pengakuan Petrus	46
Yesus memberitahu tentang kematian-Nya	47

Bab 9

Penjelmaan	49
Yesus menyembuhkan seorang anak lelaki yang bisu	51
Siapa yang terbesar?	54
Menghalau roh iblis	55
Menyebabkan orang lain berdosa	56

Bab 10

Perceraian	57
Yesus memberkati kanak-kanak	58
Orang yang kaya itu	59
Yesus memberitahu lagi tentang kematian-Nya	61
Permintaan Yakobus dan Yohanes	63
Yesus menyembuhkan Bartimeus	64

Bab 11

Yesus masuk ke Yerusalem	66
Yesus membersihkan rumat ibadat	68
Yesus mengutuk pokok ara	71
Kekuasaan Yesus dipersoalkan	72

Bab 12

Ibarat tentang penyewa ladang	73
Membayar cukai kepada Kaisar	75
Perkahwinan pada hari kebangkitan	76
Perintah yang terutama	77
Hubungan antara Yesus dan Daud	78
Persembahan seorang balu	79

Bab 13

Tanda-tanda akhir zaman	80
Hari dan masa tidak diketahui	83

Bab 14

Yesus diurapi	84
Perjamuan Tuhan	86
Petrus akan menyangkal Yesus	88
Yesus di Getsemani	89
Yesus ditangkap	90
Yesus di hadapan Majlis Agama	91
Petrus menyangkal Yesus	94

Bab 15

Yesus di hadapan Pilatus	95
Yesus dipermainkan	97
Yesus disalib	98
Kematian Yesus	100
Yesus dimakamkan	102

Bab 16

Kebangkitan Yesus	103
Yesus menampakkan diri kepada murid-Nya	105

Struktur Injil Markus

Fokus	Hamba				Korban	
Pembahagian	Hamba-hamba kepada Hamba itu	Pelayanan Hamba itu	Kata-kata Hamba itu	Khutbah-khutbah Hamba itu	Penderitaan Hamba itu	
Bab	1 3 4	7	8	10	11 13 14	16
Topik	Anak Manusia di Perjalanan				Anak Manusia di Kayu Salib	
Tempat	Satu Contoh yang hidup				Penyelamat yang mati	
	Galilea & Perea				Yudea & Yerusalem	
Masa	Sekitar 3 tahun	Sekitar 6 bulan	8 hari			
	Tahun Masehi 29-33					
Penulis	Yohanes Markus, seperti yang diberitahu kepadanya oleh Rasul Simon Petrus					

Bab 1


Yohanes

¹ Inilah permulaan Injil tentang Yesus Kristus, Anak Allah, †
Seperti yang tersurat dalam kitab Nabi Yesaya:

²“Ketahuilah, Aku akan menghantar utusan-Ku
untuk mendahului-Mu; dialah yang akan
menyediakan jalan bagi-Mu, (*Maleakhi 3:1*)

³ satu suara berseru di gurun:
‘Sediakanlah jalan untuk Tuhan,
luruskanlah jalan untuk-Nya.’” (*Yesaya 40:3*)

⁴ Demikianlah Yohanes muncul di gurun, membaptis orang dan
mengkhabarkan satu baptisan pertaubatan untuk pengampunan
dosa. ⁵ Ramailah orang yang datang dari Yudea dan Yerusalem
untuk mendengar kata-kata Yohanes. Mereka mengakui dosa
mereka lalu dibaptiskan oleh Yohanes di Sungai Yordan.





⁶Yohanes memakai pakaian yang dibuat dari-pada bulu unta dan tali pinggangnya daripada kulit. Dia makan belalang dan madu gurun.
⁷Inilah beritanya:

“Seorang yang lebih besar daripadaku akan datang selepasku. Tali kasut-Nya pun tidak layak kuurai. ⁸Aku membaptismu dengan air, tetapi Dia akan membaptismu dengan Roh Kudus.”

Yohanes membaptis Yesus




⁹Kemudian Yesus datang dari Nazaret di Galilea, lalu dibaptiskan oleh Yohanes di Sungai Yordan. ¹⁰Ketika Yesus keluar dari sungai itu, Dia melihat langit terbuka dan Roh Kudus seperti burung merpati turun hinggap ke atas-Nya.



¹¹Lalu kedengaran suara dari syurga:


“Engkaulah Anak-Ku[†] yang Kukasihi dan dengan-Mu Aku berkenan.”



¹²Lantas, Roh memimpin Yesus ke gurun.




¹³Yesus di situ selama empat puluh hari dan digoda* oleh Iblis serta dikelilingi binatang liar. Para malaikat datang melayani-Nya.



2 † Anak Allah: Lihat nota Pautan Iman pada muka surat 7.

Murid Yesus yang pertama



¹⁴ Setelah Yohanes dipenjarakan, Yesus pergi ke Galilea lalu mengkhabarkan Injil daripada Allah. ¹⁵ Yesus berkata,

“Sudah genap masanya dan kerajaan Allah hampir tiba. Bertaubatlah dan percayalah akan Injil ini!”


¹⁶ Ketika Yesus sedang berjalan di pinggir Laut Galilea, Dia ternampak Simonⁿ dan saudaranya Andreas, sedang menebarkan jala di danau kerana mereka nelayan.

¹⁷ Yesus berkata kepada mereka,

“Ikutlah Aku dan Aku akan menjadikan kamu penjala manusia.”



¹⁸ Dengan serta-merta mereka meninggalkan jala mereka dan mengikut-Nya. ¹⁹ Sejurus berjalan, Yesus melihat dua orang lagi adik-beradik, bernama Yakobus dan Yohanes, anak Zebedeus. Mereka sedang duduk mengemas-jala di dalam perahu. ²⁰ Yesus terus memanggil mereka. Kedua-dua beradik itu meninggalkan bapa mereka, Zebedeus, dengan orang gajinya di dalam perahu, lalu mengikut Yesus.



***Melawan Godaan**

Pegangan Hidup




Baca Matius 4:1-11.

Apakah dua perkataan yang Yesus ucapkan setiap kali Iblis menggoda Dia? Setiap kali Iblis menggoda Yesus, Dia menjawab, “telah tersurat.” Yesus melawan godaan dengan mengambil keputusan untuk mentaati Allah dan melakukan apa yang Allah katakan dalam Firman-Nya. Apabila anda digoda untuk melakukan sesuatu yang salah, anda juga boleh mengalahkan godaan itu. Ambillah keputusan untuk mentaati Allah dan melakukan apa yang diperintah oleh Alkitab.

Yesus membentak roh jahat

²¹Yesus dan murid-murid-Nya tiba di Kapernaum. Pada hari Sabat berikutnya, Yesus masuk ke rumah ibadat lalu mengajar. ²²Mereka kagum dengan ajaran-Nya kerana Dia mengajar dengan penuh wibawa, tidak seperti ahli Taurat mereka.



²³Ketika itu seorang yang dirasuk roh jahat berada di rumah ibadat. Dia berseru:



²⁴“Apa yang hendak Kaubuat kepada kami, hai Yesus orang Nazaret? Adakah Engkau hendak membinasakan kami? Aku tahu siapa Engkau ini. Engkau Yang Suci daripada Allah!”



²⁵Yesus membentak roh itu,

“Diam! Keluar daripada dia!”



²⁶Roh jahat itu menggoncang-goncang tubuh orang yang dirasuknya lalu keluar sambil menjerit.

²⁷Hal ini menyebabkan semua orang tercengang lalu berbisik sesama sendiri,


“Adakah ini suatu ajaran baru? Dia memerintah roh-roh jahat dengan penuh kuasa dan mereka menurut kata-Nya.”



²⁸Dengan demikian, khabar tentang Yesus segera tersebar ke seluruh Galilea.

Yesus menyembuhkan ramai orang

²⁹ Yesus dan murid-Nya, termasuk Yakobus dan Yohanes, keluar dari rumah ibadat itu lalu ke rumah Simon dan Andreas. ³⁰ Ibu mertua Simon sedang demam terbaring di tempat tidur. Setibanya Yesus di situ, Dia diberitahu tentang hal itu. ³¹ Yesus menghampiri ibu mertua Simon, memegang tangannya dan menolongnya bangun. Demam wanita itu hilang lalu dia melayan mereka.



³² Apabila malam menjelang, semua orang sakit dan orang yang dirasuk roh iblis dibawa kepada Yesus. ³³ Semua penduduk kota berhimpun di hadapan pintu itu. ³⁴ Yesus menyembuhkan ramai orang daripada pelbagai penyakit. Dia juga menghalau roh-roh iblis sambil memerintahkan mereka diam kerana mereka tahu siapa Dia.

Yesus mengajar di kota-kota lain



³⁵ Keesokannya, pada waktu subuh, Yesus bangun lalu pergi ke luar kota ke suatu tempat yang sunyi untuk berdoa. ³⁶ Simon dan rakan-rakannya pergi mencari Yesus. ³⁷ Setelah menjumpainya, mereka berkata:

“Semua orang sedang mencari-Mu!”



³⁸ Yesus berkata,

“Kita mesti ke kota-kota lain di negeri ini supaya Aku dapat menyebarkan Injil di sana. Sebab untuk itulah, maka Aku datang.”




³⁹ Lalu Yesus menjelajah ke serata Galilea dan berkhotbah di rumah ibadat dan menghalau roh-roh iblis.

Yesus menyembuhkan seorang yang sakit kusta*

⁴⁰Seorang yang menghidap penyakit kusta datang kepada Yesus lalu berlutut meminta pertolongan-Nya. Katanya,

“Jika Engkau mahu, Engkau dapat mentahirkanku.”



⁴¹Yesus berbelas kasihan lalu menghulurkan tangan-Nya menyentuh orang itu sambil berkata,

“Aku mahu. Tahirlah!”

⁴²Pada saat itu juga orang itu ditahirkan daripada penyakit kusta. ⁴³Yesus segera menyuruhnya pergi dengan memberikan suatu peringatan keras:

⁴⁴“Dengarlah, jangan beritahu sesiapa pun hal ini. Pergilah dan tunjukkan dirimu kepada imam serta persembahkan korban seperti yang diperintahkan oleh Musa, sebagai kesaksian kepada mereka bahawa kamu sudah ditahirkan.”



⁴⁵Tetapi orang itu menyebarkan hal itu merata-rata dan terus-menerus, sehingga Yesus tidak dapat masuk ke kota terang-terangan. Yesus tinggal di luar kota di tempat-tempat yang lengang, namun orang dari pelbagai kawasan datang kepada-Nya.

***Menjangkau Orang Lain**

Pegangan Hidup



Penyakit kusta ialah satu penyakit kulit. Pada zaman dahulu, seorang pesakit kusta dianggap “najis/tidak suci” dan tidak boleh menyembah Allah dengan orang lain, malah tidak boleh tinggal di dalam kota. Oleh itu mereka selalu diasingkan dan tidak ada yang mahu mendekati mereka.

Baca Markus 1:40-42. Yesus menunjukkan bahawa Dia peduli dan mengasihani pesakit kusta dengan menyentuh dan menyembuhkannya. Fikirkan beberapa orang yang anda tahu yang sedang kesepian, bersendirian dan tidak berteman. Bagaimanakah anda boleh menunjukkan kepadanya bahawa Yesus peduli dan mengasihinya? Mahukan anda menjangkau orang itu?

† Anak Allah

Pautan
Iman



Ungkapan ‘Yesus ialah Anak Allah’ tidak boleh kita samakan dengan pemahaman biasa kita tentang hubungan seorang bapa dengan seorang anak. Ia harus dilihat dalam konteks sejarah dan Alkitabiah. Gelaran “Anak Allah” yang digunakan dalam Alkitab **TIDAK PERNAH** bermaksud Allah mempunyai isteri dan mendapat anak secara harfiah. Ia adalah satu gelaran syurgawi di mana ANAK yang kekal sama dengan ALLAH BAPA (Yohanes 5:18-24).

Istilah “Anak Allah” itu merujuk kepada satu hubungan istimewa dengan Allah yang dimiliki oleh Yesus. Hubungan istimewa ini bermula dengan kelahiran Yesus yang ajaib. Malaikat itu menjawab, “Roh Kudus akan turun ke atasmu, dan kuasa Allah Yang Maha Tinggi akan menaungimu. Oleh itu, anak suci yang akan dilahirkan akan digelar Anak Allah.” (Lukas 1:35). Yesus ialah Anak Allah dalam erti kata Dia merupakan Allah yang telah menjadi manusia (Yohanes 1:1,14).

Para pemimpin Yahudi cukup mengerti maksud ungkapan “Anak Allah,” yang bererti memiliki sifat yang sama dengan Tuhan Allah. Bagi mereka, tuntutan memiliki sifat yang sama dengan Tuhan Allah adalah satu pengkufuran yang harus dijatuhkan hukuman mati. Jadi, gelaran “Anak Allah” bererti memiliki sifat yang sama dengan Tuhan Allah, satu hubungan istimewa yang dimiliki oleh Yesus dengan Allah Bapa.

Untuk Peneguhan Iman Kita

“**Anak Allah**” bererti memiliki sifat yang sama dengan Tuhan Allah, satu hubungan istimewa yang dimiliki oleh Yesus dengan Allah Bapa. “**Anak Manusia**” bererti Penyelamat yang diurapi dan yang dijanjikan. **Yesus Anak Allah** dan **Anak Manusia** ialah inti kepada iman orang Kristian tentang keilahan Yesus:

- Dia mempunyai kuasa untuk mengampuni dosa (Matius 9:6);
- Dia unik dan datang dari syurga (Yohanes 3:13);
- Dia adalah Mesias, Anak Allah yang hidup (Matius 16:13-17);
- Dia dibunuh dan bangkit daripada kematian (Matius 17:9,22,23; 20:18,19; 26:2; Markus 8:31; 9:31; 10:33,34; Lukas 9:22; 18:31-33);
- Dia menyerahkan nyawa-Nya untuk menebus manusia dari belenggu dosa (Matius 20:28);
- Semua yang percaya kepada-Nya akan mendapat kehidupan yang kekal (Yohanes 3:14,15);
- Dia juga menerima penyembahan (Yohanes 9:35-38).

Bab 2

Yesus menyembuhkan seorang lumpuh




¹ Beberapa hari kemudian, Yesus pulang ke Kapernaum dan tersebarlah khabar itu.


² Ramailah orang datang berhimpun di rumah tempat Dia tinggal itu, sehingga penuh sesak sampai ke pintu. Yesus pun menyampaikan firman kepada mereka.

³ Datanglah empat orang mengusung seorang yang lumpuh.

⁴ Mereka tidak dapat membawanya kepada Yesus kerana orang ramai itu. Oleh itu, mereka membuka bumbung rumah betul-betul di atas tempat Yesus berada lalu menurunkan orang lumpuh yang terbaring di atas tikar.



⁵ Ketika Yesus melihat iman mereka, Dia berkata kepada orang lumpuh itu,




“Anak-Ku, dosamu telah diampunkan.”

⁶ Ahli-ahli Taurat yang duduk di situ berkata dalam hati,

⁷ “Lancangnya orang ini mengkufuri Allah! Tiada siapa boleh mengampunkan dosa kecuali Allah!”






⁸Tetapi Yesus segera mengetahui dalam roh-Nya bahawa mereka berfikir demikian lalu berkata,

“Mengapa kamu berfikir begitu dalam hatimu? ⁹Manakah yang lebih mudah dikatakan kepada orang lumpuh itu: ‘Dosamu telah diampunkan,’ atau, ‘Bangun, angkat tikarmu dan berjalan?’ ¹⁰Tetapi supaya kamu tahu bahawa di bumi ini Anak Manusia[†] berkuasa mengampunkan dosa...”

Dia berkata kepada orang lumpuh itu,

¹¹“Aku berkata kepadamu, bangun, angkat tikarmu, dan pulanglah.”

¹²Di hadapan mata mereka semua, orang lumpuh itu pun bangun, mengangkat tikarnya lalu segera berjalan ke luar. Semua orang di situ tercengang lalu memuji Allah. Mereka berkata, “Belum pernah kami lihat kejadian begini!”



[†] Anak Manusia

Ungkapan ini digunakan oleh Yesus untuk diri-Nya sendiri.

Gelaran ini sangat signifikan kerana membawa erti tentang satu gambaran Mesias (Penyelamat) sesuai dengan pengertian dalam Daniel 7:13-14. Apabila Yesus ditanya sama ada Dia adalah Kristus, Dia menjawab bahawa Dia adalah Anak Manusia yang duduk di sebelah kanan Yang Maha Kuasa dan yang akan datang dalam awan di atas langit (Matius 26:64; Daniel 7:13). Jadi Yesus adalah Tuhan.

Pautan Iman



Panggilan Lewi




¹³Yesus pergi lagi ke pinggir laut. Ramai orang datang kepada-Nya lalu Dia mengajar mereka. ¹⁴Ketika Yesus berjalan di situ, Dia terpancang seorang pemungut cukai bernama Lewi anak Alfeus sedang duduk di tempat memungut cukai. Yesus berkata kepadanya,

“Ikutlah Aku,” *

lalu Lewi bangun mengikut-Nya.

¹⁵Selepas itu, Yesus makan di rumah Lewi. Ramai pemungut cukai dan orang berdosa mengikut Yesus dan ramai antara mereka turut makan bersama Yesus serta murid-murid-Nya. ¹⁶Ahli Taurat daripada golongan Farisi yang melihat perkara itu bertanya kepada para murid Yesus,



“Mengapa Dia makan bersama pemungut cukai dan ‘orang berdosa’?”



¹⁷Yesus terdengar pertanyaan itu lalu menjawab,

“Orang sakitlah yang memerlukan tabib, bukannya orang sihat. Aku datang bukan untuk memanggil orang benar, tetapi orang berdosa.”



***“Ikutlah Aku”**

Pegangan Hidup



Dua perkataan ini, “Ikutlah Aku,” masih menjadi ajakan Yesus Kristus kepada semua orang untuk mengikut-Nya dan untuk menjadi murid-Nya. Langkah pertama yang dilakukan oleh mereka yang mendengar dan mengambil keputusan untuk mengikut Yesus ialah meninggalkan dosa dan percaya kepada Yesus.

Adakah anda mendengar Dia sedang memanggil “Ikutlah Aku”?

Berpuasa

¹⁸ Pada suatu masa ketika para murid Yohanes Pembaptis dan murid orang Farisi berpuasa, beberapa orang datang kepada Yesus lalu bertanya,

“Murid Yohanes Pembaptis dan murid orang Farisi sedang berpuasa, mengapa murid-murid-Mu tidak?”



¹⁹ Yesus menjawab,

“Patutkah tetamu dalam jamuan perkahwinan berpuasa semasa pengantin lelaki masih bersama mereka? Selagi pengantin lelaki ada bersama mereka, tidaklah mereka berpuasa. ²⁰ Tetapi akan tiba saatnya pengantin lelaki diambil daripada mereka. Pada masa itulah mereka berpuasa.”

²¹ Tiada siapa akan menampal pakaian lama dengan perca kain baru,



kerana tampalan baru itu akan mengecut dan semakin koyaklah pakaian lama.



²² Begitu juga, tiada siapa menuangkan air anggur yang baru ke dalam kirbat kulit yang lama.



Kalau dilakukan, air anggur baru akan memecahkan kirbat, dan kedua-duanya terbuang.



Air anggur baru mesti dituangkan ke dalam kirbat yang baru.”



Yesus dan hari Sabat

²³Pada suatu hari Sabat, Yesus dan murid-murid-Nya berjalan melalui ladang gandum. Para murid-Nya mula memetik bulir gandum. ²⁴Kemudian orang Farisi berkata kepada Yesus,



²⁵Yesus menjawab,

“Tidakkah kamu membaca apa yang dilakukan oleh Daud semasa dia dan mereka yang berada bersamanya kekurangan dan kelaparan? ²⁶Dia masuk ke Rumah Allah sewaktu Abiatar berjawat sebagai imam besar lalu makan roti persembahan, meskipun perbuatan itu dilarang kerana hanya imam dibenarkan makan roti itu. Daud juga memberikan roti itu kepada mereka yang ada bersamanya.”




²⁷Yesus menambah,

“Hari Sabat diwujudkan untuk manusia, bukannya manusia diwujudkan untuk hari Sabat. ²⁸Jadi Anak Manusia jugalah Tuhan atas hari Sabat.”

Bab 3

¹ Kemudian Yesus masuk semula ke rumah ibadat. Di situ ada seorang yang lumpuh sebelah tangannya. ² Ada beberapa orang cuba mencari alasan untuk menuduh Yesus. Oleh itu, mereka mengawasi Yesus sama ada Dia akan menyembuhkan orang itu pada hari Sabat. ³ Yesus berkata kepada orang yang lumpuh sebelah tangannya itu,




“Berdiri, marilah ke depan.”

⁴ Kemudian Dia menyoal orang di situ,

“Manakah yang boleh kita lakukan pada hari Sabat: berbuat baik atau berbuat jahat? Menyelamatkan atau membinasakan nyawa?”

Tetapi semuanya berdiam diri. ⁵ Yesus memandang orang di sekeliling-Nya dengan rasa marah dan amat dukacita dengan mereka yang begitu keras hati. Lalu Dia berkata kepada orang yang lumpuh sebelah tangannya itu,

“Hulurkan tanganmu.”



Orang itu menghulurkan tangannya yang lumpuh, lalu tangan itu terus sembuh.





⁶ Orang Farisi keluar dari situ lalu segera berpakat dengan beberapa anggota golongan Herodesⁿ untuk membunuh Yesus.



Orang ramai mengikut Yesus

⁷ Yesus beredar ke laut bersama murid-murid-Nya. Ramai orang Galilea datang kepada-Nya. Ada yang dari Yudea, ⁸ Yerusalem, Idumea, seberang Sungai Yordan, dan sekitar Tirus dan Sidon. Mereka datang berduyun-duyun kerana mendengar segala yang telah dilakukan-Nya. ⁹ Begitu ramainya orang sehingga Yesus menyuruh murid-Nya menyediakan perahu untuk-Nya supaya Dia tidak terhimpit. ¹⁰ Ramai orang telah disembuhkan-Nya. Oleh itu, orang sakit berebut-rebut hendak menyentuh-Nya.



¹¹ Apabila orang yang dirasuk roh-roh jahat^t melihat-Nya, mereka sujud di hadapan-Nya lalu berseru,

“Engkau Anak Allah.”

¹² Yesus melarang keras mereka mengatakan siapa Dia.

3:11 Roh-roh Jahat: Pada masa itu, roh jahat atau Iblis dipandang sebagai penyebab berbagai penyakit, termasuk penyakit jiwa. Orang yang dikuasai oleh roh jahat dianggap sebagai “najis” sehingga tidak diperbolehkan untuk makan atau beribadat bersama orang lain. Masyarakat biasanya menyingkirkan orang yang dianggap najis itu kerana kluatir penyakit yang disebabkan roh jahat itu akan “berpindah” kepada mereka.


Dari ayat ini, roh-roh jahat juga tahu bahawa Yesus adalah Anak Allah, dan mempunyai kuasa ke atas mereka. Sebab itu roh-roh jahat menggeletar bila berhadapan dengan Yesus, Tuhan kita yang berkuasa!

Yesus memanggil dua belas rasul

¹³ Kemudian Yesus naik ke bukit. Dia memanggil semua orang yang dikehendaki-Nya lalu mereka datang kepada-Nya. ¹⁴ Yesus memilih dua belas orang^a antara murid-Nya itu untuk menyertai-Nya dan untuk diutus-Nya memberitakan Injil ¹⁵ serta dikurniائي kuasa untuk menghalau roh-roh iblis.



¹⁶ Dua belas orang yang dipilih-Nya itu ialah: Simon (yang juga diberi-Nya nama Petrus); ¹⁷ Yakobus dan saudaranya Yohanes iaitu anak-anak Zebedeus (dua adik-beradik ini diberi-Nya nama Boanerges, yang bermakna Anak Petir);



¹⁸ Andreas, Filipus, Bartolomeus, Matius, Tomas, Yakobus anak Alfeus, Tadeus, Simon orang Patriot ¹⁹ dan juga Yudas Iskariot yang kelak mengkhianati-Nya.




Yesus dan Beelzebul

²⁰ Selepas itu, Yesus masuk ke sebuah rumah, tetapi begitu ramainya orang yang datang berkumpul semula sehingga Yesus dan murid-murid-Nya tidak sempat makan. ²¹ Apabila keluarga Yesus mendengar perkara ini, mereka juga datang untuk mengambil-Nya apabila mendengar orang berkata, "Dia tidak siuman."



²² Sebilangan ahli Taurat dari Yerusalem berkata,

"Dia dirasuk Beelzebul!"



"Dengan kuasa ketua roh iblis Dia menghalau roh-roh iblis."

²³ Oleh itu, Yesus memanggil semua orang itu lalu bercakap melalui beberapa ibarat:

"Bagaimana Iblis dapat menghalau Iblis? ²⁴ Kalau sebuah kerajaan berpecah belah, kerajaan itu tidak dapat bertahan. ²⁵ Dan jika sebuah keluargaⁿ itu berpecah belah, keluarga itu tidak dapat bertahan. ²⁶ Dan jika Iblis berontak melawan dirinya sendiri dan berpecah belah, dia tidak dapat bertahan; sudah sampailah kemusnahannya.

²⁷ Tiada siapa dapat memasuki rumah seorang yang gagah dan merampas harta bendanya, kecuali orang gagah itu dapat diikat dahulu.

²⁸ Sesungguhnya, Aku berkata kepadamu, segala dosa dan kata kufur manusia dapat diampunkan. ²⁹ Tetapi sesiapa yang mengkufuri Roh Kudus tidak akan diampuni; dia bersalah kerana berbuat dosa kekal."

³⁰ Yesus berkata demikian kerana ada orang berkata, "Dia dirasuk roh jahat."



3:25 Keluarga merujuk kepada seisi rumah termasuk sanak saudara, pembantu rumah dan semua penghuni dalam rumah keluarga itu.

Yesus dan saudara-saudara-Nya

³¹ Apabila ibu dan saudara-saudara Yesus tiba, mereka menanti di luar dan menyuruh orang memanggil-Nya. ³² Pada waktu itu, orang ramai duduk di sekeliling Yesus berkata kepada-Nya,

“Lihatlah! Ibu dan saudara-saudara-Mu ada di luar. Mereka hendak bertemu dengan-Mu.”

³³ Yesus menjawab,

“Siapakah ibu-Ku? Siapakah saudara-saudara-Ku?”

³⁴ Dia memandang semua orang yang duduk di sekeliling-Nya lalu berkata,

“Lihat, inilah ibu dan saudara-saudara-Ku!”* ³⁵ Sesiapa yang melakukan kehendak Allah, dialah saudara lelaki, saudara perempuan, dan ibu-Ku.”



*Saudara-saudara Yesus

Pegangan
Hidup



Kita adalah saudara-saudara Yesus jika kita percaya kepada Dia. Yohanes 1:12 mengatakan, “Dia memberikan hak menjadi anak Allah kepada mereka yang menerima-Nya dan percaya dalam nama-Nya.” Pertanyaannya:


1. Adakah kita sungguh-sungguh percaya dan mengenal Yesus sehingga kita diberi hak menjadi anak Allah?
2. Bagaimana kita dapat mengenal Yesus dengan tepat dan benar?
3. Banggakah kita menjadi anak Allah dan diakui oleh Yesus sebagai saudara-Nya, atau kita malah memalukan nama-Nya?

Untuk menjadi saudara Yesus, kita harus bersedia menjadi murid yang mahu belajar Firman Tuhan dan mempraktikkannya, bukan sekadar melakukan kegiatan rutin ke gereja. Tetapi undanglah Dia untuk hadir dalam kehidupan kita bagi mendidik kita mengenal peribadi-Nya lebih dekat. Yesus bukan sahaja saudara kita, tetapi juga adalah Tuhan kita.

Bab 4

Ibarat tentang seorang penabur

¹ Yesus mula mengajar lagi di pinggir laut. Begitu ramainya orang datang berasak-asak di sekeliling-Nya sehingga Dia terpaksa duduk di dalam sebuah perahu di laut itu manakala orang ramai berdiri di pantai. ² Yesus mengajar mereka banyak perkara melalui ibarat. Dalam ajaran-Nya itu, Dia berkata:



³”Dengarlah! Seorang penabur pergi menabur benih.



Semasa dia menabur benih, ada yang jatuh di jalan, lalu dimakan

burung.




⁵ Ada pula yang jatuh di tempat berbatu yang kurang tanahnya. Benih itu segera bercambah kerana tanahnya tidak dalam. ⁶ Tetapi ketika matahari naik, tunas-tunas itu layu lalu kering kerana tidak berakar.



⁷ Ada pula yang jatuh di tengah-tengah semak duri, lalu semak membesar dan membantutkannya sehingga tidak berbuah.



⁸ Tetapi ada benih yang jatuh di tanah subur lalu bertunas, membesar dan berbuah, hasilnya tiga puluh, enam puluh atau seratus kali ganda.”




⁹ Lalu kata-Nya, “Sesiapa yang bertelinga, dengarlah!”

¹⁰Ketika Yesus bersendirian, dua belas murid-Nya dan beberapa orang yang ada bersama-Nya menanya Dia erti ibarat itu. ¹¹Yesus berkata kepada mereka,

“Kamu telah diberi rahsia kerajaan Allah. Tetapi orang luar akan mendengar segala sesuatu melalui ibarat, ¹² supaya:

‘Mereka terus melihat tetapi tidak nampak, mereka terus mendengar tetapi tidak mengerti; kerana sekiranya mereka mengerti, mereka akan berpaling dan diampuni!’ (Yesaya 6:9-10)




¹³Kemudian Yesus bertanya kepada mereka,

“Jika kamu tidak memahami ibarat itu, bagaimanakah kamu dapat mengerti ibarat yang lain? ¹⁴Penabur itu menabur firman. ¹⁵Ada orang seperti benih di



jalan, tempat firman itu ditabur. Sebaik-baik mereka mendengar firman, datanglah Iblis untuk mengambil firman yang sudah ditabur dalam hati mereka. ¹⁶Ada orang lain seperti benih yang ditabur di tempat berbatu. Mereka mendengar firman itu dan terus menerimanya dengan sukacita, ¹⁷tetapi mereka tidak berakar, maka hanya tahan seketika. Sebaik

saja mereka menanggung kesusahan atau penganiayaan kerana firman itu, iman mereka pun segera luntur. ¹⁸Ada yang lain seperti benih yang ditabur di tengah semak berduri. Mereka mendengar firman itu, ¹⁹tetapi kerunsingan tentang hal-hal dunia, tarikan palsu harta benda dan aneka kemahuan lain membantutkan firman itu sehingga tidak berbuah. ²⁰Dan yang lain seperti benih yang ditabur di tanah subur mendengar dan menerima firman itu lalu menghasilkan tiga puluh, enam puluh bahkan seratus kali ganda.”



Ibarat tentang pelita

²¹ Yesus berkata pula,

“Pernahkah orang memasang pelita lalu menyorokkannya di bawah pasu atau katil? Tentu diletakkannya di atas kaki pelita.

²² Yang tersembunyi akan dinyatakan, yang dirahsiakan akan didedahkan.


²³ Jika kamu bertelinga, dengarlah.”



²⁴ Selepas itu Yesus berkata,

“Perhatikan apa yang kamu dengar. Ukuran yang kamu gunakan untuk mengukur akan digunakan terhadapmu, malah lebih berat lagi. ²⁵ Sesiapa yang ada sesuatu akan diberi lebih banyak lagi; tetapi sesiapa yang tidak mempunyai sesuatu, sedikit yang ada padanya pun akan diambil daripadanya.”

Ibarat tentang benih yang tumbuh



²⁶ Yesus berkata seterusnya,


“Kerajaan Allah ibarat seorang yang menabur benih di ladangnya.

²⁷ Malam dia tidur, siang dia bekerja. Benih itu terus-menerus tumbuh dan membesar. Dia tidak faham bagaimana hal itu terjadi.

²⁸ Tanahlah yang menumbuhkan tanaman hingga berbuah – mula-mula pucuk, kemudian bulir, akhirnya buah. ²⁹ Setelah masak, buahnya disabit oleh orang itu dengan segera kerana musim menuai telah tiba.”



Ibarat tentang biji sesawi





³⁰”Dengan apakah dapat kita bandingkan kerajaan Allah?”[†]

kata Yesus lagi.

“Apakah ibarat yang dapat digunakan untuk menjelaskannya? ³¹ Kerajaan Allah itu seperti sebutir biji sesawi paling kecil di dunia yang ditabur di tanah. ³² Tetapi apabila ditabur, benih itu tumbuh dan menjadi tumbuhan yang terbesar. Dahannya begitu rimbun sehingga burung di udara membuat sarang di bawah keteduhannya.”

³³ Dengan banyak ibarat yang semacam itu Yesus mengajar tentang firman kepada mereka, setakat yang dapat mereka faham.

³⁴ Dia tidak berucap kepada mereka tanpa menggunakan ibarat. Tetapi apabila Dia bersendirian dengan murid-murid-Nya, Dia menjelaskan segala-galanya.



† Kerajaan Allah

Pautan Iman



Kerajaan adalah pemerintahan yang dikuasai oleh seorang raja. Jadi, Kerajaan Allah adalah pemerintahan yang didirikan oleh Allah, pemerintahan dan kedaulatan yang telah didirikan dalam hati dan jiwa manusia, dan yang akan diserahkan dengan sepenuhnya pada Hari Akhir. Yesus berbicara panjang lebar tentang Kerajaan Allah, menjadikan itu tema berita-Nya. Ia disebut lebih dari 110 kali dalam keempat Injil. Tetapi Yesus tidak mengajar dengan kata-kata saja. Dia menunjukkan dan mengajar banyak hal tentang Kerajaan Allah melalui tindakan-Nya. Dalam pengajaran-Nya, Yesus menyingkapkan bahawa Dialah yang dipilih oleh Allah untuk menjadi Raja, yang dimengertikan oleh orang Yahudi sebagai Mesias.

Bagi kita yang percaya kepada Yesus, kewargaan kita adalah di syurga (Filipi 3:20a). Yesus Kristus menyatakan bahawa Kerajaan Allah sudah tiba kepada sesiapa yang bertaubat (Matius 4:17). Yesus Kristus juga menyatakan bahawa seseorang hanya boleh memasuki Kerajaan Allah jikalau dia dilahirkan semula (Yohanes 3:3-5). Apabila Yesus kembali ke syurga, Allah meletakkan Kristus sebagai pemimpin atas kerajaan-Nya (Efesus 1:19-23) dan pada Hari Akhir Dia akan mengembalikan kerajaan kepada Allah (1 Korintus 15:24).

Apakah erti kedatangan Kerajaan Allah bagi anda secara peribadi? Itu semua bergantung kepada cara anda memilih untuk menanggapi berita Yesus.

Angin ribut diredakan

³⁵ Pada petang itu juga, Yesus berkata kepada murid-murid-Nya, "Marilah kita pergi ke seberang sana."



³⁶ Ketika itu Yesus di dalam perahu. Para murid-Nya meninggalkan orang ramai itu di pantai lalu belayar bersama-Nya. Ada beberapa perahu lain yang belayar bersamanya.



³⁷ Lalu angin ribut bertiup kencang dan ombak melanda perahu sehingga hampir dipenuhi air.




38 Ketika itu Yesus sedang tidur di buritan perahu, kepala-Nya beralaskan bantal. Para murid-Nya membangunkan Dia lalu berkata,

“Guru, tidakkah Engkau peduli? Kita hampir karam!”



“Diam! Tenanglah!”



39 Yesus bangun lalu menegur angin dan berkata kepada ombak,



Angin pun reda dan laut menjadi tenang.




40 Kemudian Yesus berkata kepada murid-murid-Nya,

“Mengapa kamu begitu takut? Mengapa kamu masih tidak percaya?”

41 Mereka berasa gerun lalu berkata sesama sendiri,

“Siapakah Dia ini? Angin dan ombak pun mengikut perintah-Nya!”



Bab 5

Yesus menyembuhkan seorang yang dirasuk roh iblis



¹ Lalu sampailah mereka di seberang laut, di daerah Gerasa.



² Sebaik-baik Yesus turun dari perahu, seorang lelaki yang kerasukan roh jahat keluar dari perkuburan lalu menemui-Nya.

³ Orang itu tinggal di gua kubur. Tiada siapa terdaya mengikatnya lagi, meskipun dengan rantai. ⁴ Berkali-kali dia dirantai dan dibelenggu, tetapi dapat diputuskannya rantai itu dan dipatahkannya belenggu itu. Tiada seorang pun dapat menguasainya.



⁵ Siang malam dia merayau di perkuburan dan di bukit, sambil menjerit-jerit dan mencederakan badannya dengan batu.

⁶ Dari jauh dia melihat Yesus lalu lari mendekati-Nya dan sujud di hadapan-Nya. ⁷ Orang itu berseru dengan suara keras,

“Ya Yesus, Anak Allah Yang Maha Tinggi, apa urusan-Mu dengan aku? Demi Allah, jangan seksa aku!”



⁸ Kerana sebelumnya Yesus berkata kepadanya,

“Roh jahat, keluarlah kamu daripada orang ini!”



⁹ Kemudian Yesus bertanya kepadanya,

“Siapakah namamu?” Orang itu menjawab,



“Legion, kerana kami ini ramai sekali.”

¹⁰ Dia memohon sungguh-sungguh kepada Yesus supaya tidak menghalau mereka keluar dari kawasan itu.

¹¹ Berdekatan tempat itu ada kawanan babi yang sedang mencari makan di lereng bukit. ¹² Roh-roh iblis itu memohon kepada Yesus,

“Suruhlah kami pindah kepada babi itu, biarlah kami masuk ke dalam tubuh babi itu.”

¹³ Yesus bersetuju, lalu roh-roh jahat itu keluar dan masuk ke dalam tubuh kawanan babi itu. Kesemua babi itu, kira-kira dua ribu ekor, terjun dari tepi cenuram ke dalam laut lalu mati lemas.



¹⁴ Penjaga-penjaga babi itu lari lalu menyebarkan berita itu di bandar dan di desa. Para penduduk pun keluar hendak melihat apa yang telah terjadi. ¹⁵ Mereka menghampiri Yesus lalu melihat orang yang tadinya dirasuk legion daripada roh iblis itu, kini duduk diam, sudah berpakaian dan ternyata siuman. Mereka semua pun ketakutan.

¹⁶ Semua yang telah menyaksikan kejadian itu menceritakan segala-galanya tentang orang yang kerasukan roh iblis dan kawanan babi itu. ¹⁷ Oleh itu, mereka meminta Yesus meninggalkan daerah itu.

¹⁸ Ketika Yesus menaiki perahu, orang yang tadinya dirasuk roh iblis itu memohon kepada-Nya, supaya dia dibenarkan menyertai-Nya. ¹⁹ Tetapi Yesus tidak membenarkannya, sebaliknya berkata,

“Pulanglah kepada keluargamu, kepada orang sekampungmu. Beritahu mereka betapa besarnya pertolongan Tuhan bagimu dan bagaimana Dia telah berbelas kasihan kepada kamu.”



²⁰ Orang itu pun mula menjelajahi daerah sepuluh kota dan menceritakan segala yang telah dilakukan oleh Yesus untuknya. Mereka semua kehairanan.


Yesus melakukan mukjizat dan penyembuhan

²¹ Setelah itu, Yesus kembali menyeberang laut dengan perahu. Setiba-Nya di pantai sebelah sana, Dia dikerumuni orang yang ramai sekali.



²² Datanglah seorang bernama Yairus, ketua rumah ibadat di situ. Ketika dia melihat Yesus, dia sujud di hadapan-Nya

²³ dan merayu,




“Anak perempuanku sakit tenat, hampir mati. Tolonglah datang, letakkan tangan-Mu padanya, supaya dia sembuh dan dapat terus hidup.”

²⁴ Yesus pun pergi bersama Yairus. Begitu ramainya orang yang mengikut Yesus sehingga Dia diasak dari semua pihak. ²⁵ Di situ ada seorang wanita yang menghidap penyakit pendarahan selama dua belas tahun.

²⁶ Dia telah menghabiskan segala hartanya untuk dirawat oleh ramai tabib tetapi tidak sembuh, tetapi semakin parah keadaannya.

²⁷ Wanita itu telah banyak mendengar tentang Yesus. Oleh itu, dia masuk ke tengah-tengah orang ramai itu dan mendekati Yesus dari belakang lalu menyentuh jubah-Nya. ²⁸ kata wanita itu,

“Kiranya dapat kusentuh jubah-Nya, tentu aku akan sembuh.”ⁿ



²⁹ Dengan serta-merta pendarahannya berhenti. Dia merasakan badannya sudah sembuh.

5:28 Tentu aku akan sembuh: Sesuatu yang wanita itu dengar tentang Yesus telah membangkitkan imannya dan membuatnya percaya bahwa Yesus dapat menyembuhkan penyakitnya.

³⁰Pada saat itu Yesus sedar ada kuasa yang telah keluar daripada-Nya lalu Dia bertanya, “Siapa yang menyentuh jubah-Ku?” ³¹Para murid-Nya berkata,



“Lihatlah orang berasak-asak di sekeliling Engkau. Bagaimana Engkau boleh bertanya siapa yang menyentuh-Mu?”


³²Tetapi Yesus memandang sekeliling-Nya, mencari orang yang telah menyentuh-Nya itu.



³³Wanita itu mengetahui apa yang telah terjadi kepada dirinya. Dia gementar ketakutan, lalu tampil dan sujud kepada Yesus serta menceritakan segala-galanya.

³⁴Yesus berkata kepadanya,

“Hai anak-Ku, imanmu telah menyembuhkanmu. Pergilah dengan sejahtera dan sembuhlah daripada penyakitmu.”



³⁵Sedang Yesus berkata-kata itu, beberapa orang pesuruh datang daripada keluarga ketua rumah ibadat dan memberitahu Yairus,



“Anak perempuan tuan sudah meninggal. Usahlah tuan susahkan Guru lagi.”

³⁶Yesus tidak menghiraukan kata-kata itu. Dia berkata kepada ketua rumah ibadat,

“Jangan takut, percaya sahaja.”

³⁷Lalu Yesus tidak membenarkan sesiapa pun mengikut-Nya kecuali Petrus, Yakobus dan Yohanes, saudara Yakobus. ³⁸Apabila tiba di rumah ketua rumah ibadat, Yesus melihat keadaan yang kelim-kabut^a dan mendengar ratap tangis yang kuat.

5:38 Kelam-kabut: Keluarga yang sedang berduka biasanya mengupah kumpulan peratap semasa ada pengebumian. Sebelum jenazah dibawa ke tanah perkuburan, para ahli keluarga, jiran tetangga dan peratap upahan akan meratap dengan suara nyaring. Penguburan biasanya dilakukan pada hari yang sama seseorang itu meninggal dunia.

Markus 5:39-43

³⁹Yesus masuk lalu berkata kepada mereka,

“Mengapa kelim-kabut dan menangis?
Anak itu tidak mati, cuma tidur.”



⁴⁰Tetapi mereka mentertawakan Yesus.



Setelah menyuruh mereka semua keluar, Yesus mengajak ibu bapa anak itu dan murid-murid-Nya masuk ke bilik tempat anak itu terbaring.



⁴¹Yesus memegang tangan anak itu lalu berkata kepadanya,

“Talitha kum!”

(maksudnya, “Anak perempuan, Aku berkata kepadamu, bangunglah!”)



⁴²Anak perempuan yang berusia dua belas tahun itu segera bangkit⁴² lalu berjalan. Mereka semua sungguh kagum. ⁴³Tetapi dengan tegas Yesus melarang mereka memberitahu sesiapa tentang perkara itu, lalu menyuruh mereka memberi anak itu makan.

5:42 Bangkit: Injil mencatatkan tiga peristiwa di mana Yesus membangkitkan orang mati: anak perempuan Yairus (Markus 5:21-43), anak lelaki seorang balu di kota Nain (Lukas 7:11-17) dan Lazarus (Yohanes 11:1-45). Kebangkitan yang paling agung adalah kebangkitan Yesus dari maut (Markus 16:5-14). Semua ini menunjukkan keilahan Yesus yang mempunyai kuasa ke atas kematian/maut. Dia adalah Tuhan yang berkuasa ke atas kehidupan dan kematian.

Bab 6

Yesus mengajar di Nazaret

¹ Yesus beredar dari situ lalu pulang bersama murid-murid-Nya ke kampung halaman-Nya. ² Pada hari Sabat Dia mula mengajar di rumah ibadat. Ramai di situ hairan mendengar ajaran Yesus.



“Dari manakah Dia memperoleh semua ini?”

tanya mereka.

“Apakah kebijaksanaan yang ada pada-Nya? Bagaimanakah Dia dapat melakukan mukjizat?”


³ Bukankah Dia ini tukang kayu, anak kepada Maria, saudara kepadaⁿ Yakobus, Yoses, Yudas dan Simon?”

“Bukankah saudara-saudara perempuan-Nya tinggal di sini?”

Oleh itu, mereka enggan menerima-Nya. ⁴ Yesus berkata kepada mereka,

“Seorang nabi dihormati di mana-mana kecuali di kampung halamannya, antara sanak saudaranya dan dalam keluarganya sendiri.”

⁵ Dia tidak dapat melakukan satu mukjizat pun di situ. Dia hanya menyembuhkan beberapa orang sakit dengan meletakkan tangan-Nya pada mereka. ⁶ Dia sungguh hairan bahawa mereka tidak percaya.



6:3 Saudara-saudara Yesus: Tidak banyak yang diketahui tentang saudara-saudara Yesus ini, kecuali Yakobus yang melihat Yesus yang telah bangkit (1 Korintus 15:7). Dia menjadi pemimpin jemaat yang awal di Yerusalem (KPR 15:13; 21:18; Galatia 1:29). Menurut tradisi, Yakobus dihukum mati sekitar tahun 70 Masehi.

Yesus mengutus dua belas orang murid-Nya

Selepas itu, Yesus pergi ke kampung-kampung di sekitar itu dan mengajar.
⁷ Dia memanggil murid-Nya yang dua belasⁿ itu, lalu mengutus mereka berdua-dua, serta memberi mereka kuasa atas roh-roh jahat.

⁸ Perintah-Nya kepada mereka demikian:




“Jangan bawa apa-apa dalam perjalanan, kecuali sebatang tongkat – roti pun jangan, beg pun jangan, wang dalam tali pinggang pun jangan. ⁹ Pakailah capal, tetapi jangan pakai dua helai baju.”

¹⁰ Yesus berkata lagi,

“Apabila kamu disambut di sesebuah rumah, menetaplah di situ hingga kamu beredar dari bandar itu. ¹¹ Sebaliknya, jika penduduk sesuatu bandar enggan menyambutmu atau mendengar kata-katamu, pergilah dari situ dan kebas-kanlah debu daripada tapak kakimu sebagai kesaksian terhadap mereka.”

¹² Murid Yesus yang dua belas itu pun pergi menyampaikan berita bahawa manusia harus bertaubat.

¹³ Mereka menghalau banyak roh iblis, dan menyapukan minyak pada ramai orang sakit serta menyembuhkan mereka.




6:7 Murid-Nya yang dua belas: Dua belas orang murid Yesus (yang dipanggil rasul, yang bererti orang yang dipilih dan diutus oleh seorang pemimpin) sama dengan jumlah suku Israel. Yesus memberi kuasa kepada mereka untuk memberitakan Injil dan mengusir iblis.

Yohanes dibunuh

¹⁴Raja Herodes mendengar tentang kejadian itu, kerana nama Yesus sudah terkenal di mana-mana. Ada orang berkata,

“Yohanes Pembaptis telah dibangkitkan daripada kematian! Itulah sebab Dia mempunyai kuasa melakukan mukjizat.”



¹⁵Yang lain berkata, “Dia ini Elia.”

Ada pula yang berkata,

“Dia ini nabi, seperti nabi zaman dahulu.”

¹⁶Ketika mendengar hal demikian, Herodes berkata,



“Dia itu Yohanes yang kepalanya telah kupancang, tetapi dia hidup semula!”



¹⁷Sebabnya memang Herodes telah memberikan perintah supaya Yohanes ditangkap, diikat dan dipenjarakan. Herodes berbuat demikian kerana Herodias, isteri kepada saudaranya Filipus, yang telah dikahwininya. ¹⁸Yohanes pernah menegur perbuatan Herodes itu,

“Mengambil isteri saudaramu sebagai isterimu adalah haram.”

¹⁹Akibatnya Herodias menaruh dendam terhadap Yohanes dan hendak membunuhnya, tetapi hasratnya terhalang, ²⁰kerana Herodes takut akan Yohanes.

Herodes tahu Yohanes seorang yang benar dan suci, oleh itu dia melindungi Yohanes. Herodes juga suka mendengar kata-kata Yohanes, meskipun kata-kata itu membuatnya sangat gelisah. ²¹ Akhirnya Herodias mendapat peluang apabila Raja Herodes mengadakan jamuan hari jadinya untuk semua pegawai tinggi kerajaan, panglima dan tokoh masyarakat Galilea.



²² Anak gadis Herodias menari dan menghiburkan Herodes serta tetamunya. Oleh itu, raja berkata kepada gadis itu,

“Mintalah daripadaku apa sahaja yang kamu ingini dan akan kuberikan kepadamu.”

²³ Dia menyambung dengan sumpah,

“Apa sahaja yang kamu minta akan kuberikan kepadamu, walau separuh kerajaanku sekalipun.”



²⁴ Gadis itu pergi bertanya kepada ibunya,

“Apakah yang patut kuminta?”

Jawabnya,

“Kepala Yohanes Pembaptis.”



²⁵ Gadis itu segera kembali kepada raja dan berkata,

“Aku mahu kamu berikan kepadaku kepala Yohanes Pembaptis di atas talam sekarang juga.”

²⁶ Lalu raja amat berdukacita, tetapi apakan daya, dia telah bersumpah di hadapan semua tetamunya. Oleh itu, dia tidak mahu menolak permintaannya. ²⁷ Dia pun memberikan perintah kepada askar supaya membawa kepala Yohanes. Askar itu pergi ke penjara lalu memancing kepala Yohanes.



²⁸ Dia membawa kepala itu di atas talam dan menyerahkannya kepada gadis itu. Lalu gadis itu menyerahkan kepala Yohanes kepada ibunya. ²⁹ Apabila murid-murid Yohanes mendengar perkara itu, mereka datang dan mengambil jenazah Yohanes lalu mengebumikannya di dalam kubur.

Kesahihan Alkitab

*Pautan
Iman*



Injil pernah dipalsukan, tetapi bukan oleh orang Kristian!

Pemalsuan Injil dilakukan oleh tokoh-tokoh agama palsu yang menyelewengkan ajaran daripada Injil yang asli. Injil palsu yang paling baru dan paling mudah untuk dibuktikan kepalsuannya ialah “Injil Barnabas”. Ia dipercayai ditulis antara tahun 1500 dan 1590 di Eropah Selatan, pertama kali dijumpai pada 1920-an dan mula dicetak dan disebar luas pada tahun 1973.

Lain kali bila anda dicabar tentang kesahihan Alkitab, katakan:

“Di dalam pengalaman dan pengetahuan saya, Kitab Injil adalah benar dan sahih. Jika Kitab Injil telah diubah dan dipalsukan, bolehkah anda tunjukkan:

- Apakah yang original/asli?
- Apakah yang telah diubah atau dipalsukan?
- Siapakah yang telah mengubahnya?
- Di manakah ia telah diubah?
- Bilakah ia telah diubah?

Jika anda dapat buktikan kesemua itu, barulah saya mahu mempertimbangkan dakwaan Kitab Injil telah dipalsukan!”

Yesus memberi makan kepada lima ribu orang

³⁰ Kemudian rasul-rasul kembali berkumpul dengan Yesus dan melaporkan segala yang telah dilakukan serta diajarkan mereka.

³¹ Orang yang datang dan pergi di situ begitu ramainya sehingga Yesus dan murid-murid-Nya tidak sempat makan. Oleh itu, Yesus berkata kepada murid-murid-Nya,

“Marilah ke tempat yang sunyi supaya kita dapat bersendirian, dan berehat sebentar.”



³² Mereka pun bertolak dengan perahu ke tempat yang sunyi. ³³ Tetapi pada waktu mereka bertolak ramai orang melihat dan mengenal mereka. Orang dari semua kota berlari ikut jalan darat supaya sampai di tempat yang dituju itu sebelum Yesus dan murid-murid-Nya.

³⁴ Apabila Yesus turun dari perahu dan melihat orang ramai di situ, hati-Nya berbelas kasih terhadap mereka kerana mereka ibarat domba tanpa gembala. Dia pun mula mengajar banyak perkara kepada mereka. ³⁵ Ketika hari sudah petang, para murid Yesus datang kepada-Nya dan berkata,

“Hari sudah hampir malam dan kawasan ini terpencil.


³⁶ Suruhlah semua orang ini pergi supaya mereka ke pekan atau ke kampung yang berdekatan untuk membeli makanan.”

³⁷ Tetapi Yesus menjawab,

“Kamu berilah mereka makan.”

Para murid-Nya bertanya,

“Haruskah kami pergi membeli roti berharga dua ratus keping wang dinar untuk memberi mereka makan?”




³⁸Yesus bertanya,


“Pergilah lihat berapa banyak roti yang ada pada kamu.”

Setelah mereka memeriksanya, mereka berkata,

“Lima buku roti dan dua ekor ikan.”



³⁹Yesus mengarahkan mereka supaya menyuruh semua orang di situ duduk berkelompok-kelompok di atas rumput. ⁴⁰Mereka pun duduk dalam kelompok; ada yang seratus orang sekelompok dan ada yang lima puluh orang. ⁴¹Setelah Yesus mengambil lima buku roti dan dua ekor ikan itu, Dia menengadahkan ke langit dan mengucapkan syukur. Kemudian Dia memecah-mecahkan roti itu dan menghulurkannya kepada murid-murid-Nya untuk diberikan kepada orang ramai itu. Dia juga membahagikan dua ekor ikan itu kepada mereka semua.



⁴²Mereka semuanya makan sehingga kenyang. ⁴³Para murid-Nya mengumpulkan lebihan makanan dan ikan sebanyak dua belas bakul. ⁴⁴Jumlah orang lelaki yang makan itu kira-kira lima ribu orang.

Yesus berjalan di atas air



⁴⁵ Yesus segera mengarahkan murid-murid-Nya pergi dahulu dengan perahu ke Betsaidaⁿ di seberang laut sementara Dia menyuruh orang ramai itu pulang.

⁴⁶ Setelah mereka pergi, Yesus naik ke bukit untuk berdoa.



⁴⁷ Apabila hari sudah malam, perahu para murid Yesus sudah sampai ke tengah laut sedangkan Yesus seorang diri di darat. ⁴⁸ Yesus melihat murid-murid-Nya bersusah payah mendayung perahu kerana angin bertiup dari arah bertentangan. Kira-kira antara dinihari dan subuh,ⁿ Yesus berjalan di atas air menghampiri mereka. Dia hendak mendahului mereka.

⁴⁹ Tetapi ketika mereka terpancang Dia berjalan di atas air, mereka menyangka-Nya hantu lalu mereka berteriak-teriak. ⁵⁰ Mereka ketakutan melihat Yesus. Tetapi Dia segera berkata kepada mereka,

“Tabahkanlah hatimu! Aku Yesus. Jangan takut.”*

⁵¹ Dia naik ke perahu mereka, lalu angin pun teduh. Para murid-Nya hairan tercengang.

⁵² Mereka masih belum mengerti apa sebenar yang berlaku dengan roti itu, kerana hati mereka masih keras.




6:45 Betsaida: Sebuah kota Yahudi yang terletak di sebelah timur muara Sungai Yordan.

6:48 Subuh: Antara pukul tiga dan enam pagi



⁵³ Mereka menyeberang hingga tiba di Genesaret. Di situ mereka menambat perahu itu. ⁵⁴ Sebaik-baik mereka turun dari perahu, orang mengenal Yesus ⁵⁵ lalu berlari ke serata kawasan dan membawa orang sakit yang terbaring di atas tikar kepada-Nya di mana-mana sahaja Dia berada.

⁵⁶ Di setiap tempat yang dikunjungi-Nya – baik di kota, di pekan mahupun di kampung – penduduk di situ membawa orang yang sakit ke pasar. Mereka memohon agar sekurang-kurangnya Yesus membenarkan mereka menyentuh hujung jubah-Nya. Semua yang menyentuhnya terus sembuh.



***“Aku Yesus. Jangan takut.”**

*Pegangan
Hidup*



Ada banyak ketakutan dan ketidakpastian di dunia kita hari ini. Tetapi apa sahaja ribut itu. Apa pun keadaan huru-hara itu. Apa sahaja yang membuat kita panik. Apa sahaja kesakitan, kerugian atau kebimbangan itu. Apabila kita berasa seperti sedang mengharung angin ribut pada pukul empat pagi. Ingatlah bahawa Yesus berjalan dengan kita. Dia tidak tergoncang oleh keadaan kita.

Dan pada saat-saat kelemahan itu, kita hanya perlu tahu: “Tabahkanlah hatimu! Aku Yesus. Jangan takut.” Dalam kekacauan itu, kita mendapat keberanian, kerana kita dapat beristirahat dengan keberanian Kristus. Setiap kali kita berasa bersendirian dan ketakutan, Yesus berkata, “Aku Yesus. Jangan takut.”

Doa:

Tuhan Yesus, terima kasih kerana saya tidak pernah bersendirian dalam segala pergumulan saya. Saya dapat mendengar suara Engkau lebih jelas daripada suara angin dan ombak. Penuhilah saya dengan keberanian-Mu. Berkatilah saya dengan kehadiran-Mu yang damai. Dalam nama kudus-Mu saya berdoa. Amen.

Bab 7


Adat istiadat nenek moyang

¹Orang Farisi dan beberapa ahli Taurat yang datang dari Yerusalem berkumpul di keliling Yesus. ²Mereka melihat beberapa murid Yesus makan dengan tangan najis, yaitu tangan yang tidak dibasuh. ³(Orang Farisi malah semua orang Yahudi taat mengikut adat istiadat nenek moyang mereka. Mereka tidak akan makan sebelum membasuh tangan menurut cara-cara yang ditentukan.

⁴Apabila pulang dari pasar, mereka juga tidak akan makan sebelum membersihkan diri. Banyak lagi peraturan yang diamalkan oleh mereka, seperti dalam hal membasuh cawan, kendi, dan bekas tembaga.)

⁵Oleh itu, orang Farisi dan ahli Taurat di situ bertanya kepada Yesus,

“Mengapakah murid-Mu tidak menurut adat istiadat nenek moyang kita? Mengapakah mereka makan dengan tangan yang najis?”



⁶Yesus menjawab,

“Tepat sekali kata-kata Yesaya dalam nubuatnya tentangmu, hai orang munafik; seperti yang tersurat:

‘Bangsa ini menghormati-Ku dengan kata-kata, tetapi hati mereka jauh daripada-Ku. ⁷Sia-sialah mereka beribadat kepada-Ku; sedangkan ajaran yang diajarkan mereka ialah peraturan manusia.’

(Yesaya 29:13)

⁸“Kamu mengetepikan perintah Allah untuk menurut adat istiadat manusia.”

⁹Yesus berkata lagi: “Kamu sungguh pandai menyingkirkan perintah Allah untuk menegakkan adat istiadatmu sendiri! ¹⁰Musa menyampaikan perintah ini, ‘Hormatilah ibu bapamu’ dan ‘Orang yang mencaci ibu bapa sendiri mesti dihukum mati.’ ¹¹Tetapi kamu mengajar: Jika seseorang berkata kepada ibu bapanya, ‘Apa yang harus kugunakan untuk membantu ayah dan ibu, sudah kujadikan korban’ (iaitu telah dipersembahkan kepada Allah), ¹²maka orang itu tidak perlu menolong ibu bapa. ¹³Jadi, adat istiadat yang kamu sampaikan membatalkan firman Allah. Banyak lagi perkara sedemikian yang kamu lakukan.”

¹⁴Yesus memanggil orang ramai itu lagi lalu berkata kepada mereka,

“Kamu semua, dengarlah kepada-Ku dan fahamlah. ¹⁵Apa yang masuk dari luar ke dalam seseorang tidak dapat menjajiskannya. Apa yang keluar daripada seseorang itulah yang menjajiskannya. ¹⁶Jika kamu bertelinga, dengarlah!”



¹⁷Setelah Yesus meninggalkan orang ramai itu dan masuk ke rumah, murid-murid-Nya bertanya kepada-Nya tentang maksud ibarat itu. ¹⁸Yesus berkata kepada mereka,



“Kamu ini sama dengan mereka. Tidakkah kamu faham bahawa apa yang masuk dari luar ke dalam seseorang tidak dapat menjajiskannya? ¹⁹Kerana sesuatu itu tidak masuk ke hatinya tetapi ke dalam perutnya, kemudian keluar semula.”

(Dengan demikian Dia menyatakan semua makanan halal.)

²⁰Kata-Nya lagi:

“Apa yang keluar daripada seseorang itu menjajiskannya ²¹kerana dari dalam, dari hati manusia timbul fikiran jahat yang mendorong seseorang berfikiran durjana, berbuat cabul, mencuri, membunuh, ²²berzina, tamak, berdendam, menipu, mengeluarkan kata-kata lucah, bermata jahat, dengki, mengkufuri Allah, berlagak sombong, dan bersikap bodoh. ²³Semua perkara jahat ini timbul dari dalam hati dan itulah yang menjajiskan seseorang.”

Iman seorang perempuan Siro-Fenisia



²⁴ Kemudian Yesus pergi dari situ ke kawasan berdekatan kota Tirus, lalu masuk ke sebuah rumah. Dia tidak mahu orang tahu Dia ada di situ tetapi Dia tidak dapat menyembunyikan diri.



²⁵ Ibu kepada seorang anak perempuan yang dirasuk roh jahat telah mendengar tentang Yesus lalu segera datang kepada-Nya dan sujud di hadapan-Nya. ²⁶ Wanita itu seorang Yunani, dia berasal dari daerah Fenisia di Siria. Dia memohon Yesus menghalau roh iblis yang merasuk anaknya.

²⁷ Yesus menjawab,

“Anak-anak harus diberi makan dahulu. Tidak patut mengambil roti anak-anak dan mencampakkannya kepada anjing.”

²⁸ Jawab wanita itu,

“Benar, Tuan. Tetapi anjing di bawah meja pun makan sisa yang dijatuhkan oleh anak-anak.”

²⁹ Maka Yesus berkata kepadanya,

“Kerana jawapanmu itu, pulanglah. Roh iblis sudah keluar daripada tubuh anakmu.”




³⁰ Apabila ibu itu pulang ke rumah, dia mendapati anaknya sedang berbaring di katil dan tidak lagi dirasuk roh iblis.

Yesus menyembuhkan seorang bisu tuli

³¹ Selepas itu Yesus meninggalkan daerah Tirus, meneruskan perjalanan ke Laut Galilea melalui Sidon, ke tengah-tengah daerah Sepuluh Kota. ³² Di sana seorang bisu tuli dibawa kepada-Nya dengan permohonan agar Yesus meletakkan tangan padanya.



³³ Yesus membawanya ke samping, jauh daripada orang ramai itu, lalu memasukkan jari-Nya ke dalam kedua-dua belah telinga orang itu. Kemudian Dia meludah dan menyentuh lidah orang itu. ³⁴ Selepas itu, Dia menengadahkan kepala lalu menarik nafas panjang dan berkata kepada orang itu,



³⁵ Serta-merta telinga orang itu terbuka dan lidahnya pulih, lalu dia bertutur dengan baik. ³⁶ Yesus melarang semua yang hadir menceritakan hal itu kepada sesiapa pun. Tetapi semakin Yesus melarang, semakin mereka menceritakannya.



³⁷ Mereka sungguh hairan dan berkata,


“Dia melakukan segala-galanya dengan baik sekali. Dia membolehkan orang tuli mendengar dan orang bisu berkata-kata.”

Bab 8

Yesus memberi makan kepada empat ribu orang

¹ Pada suatu hari, ketika orang tersangat ramai berhimpun dan kehabisan makanan, Yesus memanggil murid-murid-Nya lalu berkata,

² "Aku berbelas kasihan kepada orang ramai ini, sudah tiga hari mereka bersama-Ku, dan sekarang mereka kehabisan makanan. ³ Kalau Kusuruh mereka pulang dengan perut kosong, mereka akan pengsan di tengah jalan kerana ada yang datang dari jauh."



⁴ Para murid Yesus menjawab,


"Di tempat terpencil ini, di mana hendak dicari roti yang cukup untuk semua orang ini?"


⁵ Yesus bertanya kepada mereka,

"Berapa banyakkah roti yang ada padamu?"

"Tujuh buku," jawab mereka.


⁶ Yesus menyuruh orang ramai itu duduk di atas tanah. Dia mengambil tujuh buku roti itu dan mengucap syukur. Setelah itu, Dia memecah-mecahkannya dan menghulurkannya kepada murid-murid-Nya untuk dihidangkan. Mereka pun memberikannya kepada orang ramai. ⁷ Mereka juga ada beberapa ekor ikan kecil. Setelah mengucap syukur atasnya, Yesus menyuruh supaya ikan itu dibahagi-bahagikan juga.






⁸ Mereka pun makan sehingga kenyang. Sisa lebihan makanan yang dikumpulkan sebanyak tujuh bakul penuh. ⁹ Bilangan mereka itu kira-kira empat ribu orang. Yesus pun menyuruh mereka pulang.

¹⁰ Selepas itu, Yesus terus menaiki perahu bersama murid-murid-Nya pergi ke daerah Dalmanuta.



¹¹ Beberapa orang Farisi datang kepada Yesus dan mula bersoal jawab dengan-Nya. Untuk menduga-Nya, mereka meminta-Nya menunjukkan suatu tanda dari syurga.




¹² Yesus mengeluh lalu menjawab,

“Mengapakah orang zaman ini mencari suatu tanda ajaib? Sesungguhnya, Aku berkata kepadamu, satu tanda pun tidak akan ditunjukkan kepada orang zaman ini.”



¹³ Yesus meninggalkan mereka dan kembali ke perahu lalu ke seberang.

Ragi orang Farisi dan ragi Herodes



¹⁴Para murid Yesus terlupa membawa roti yang mencukupi. Di dalam perahu itu cuma ada sebuku roti. ¹⁵Yesus mengingatkan mereka,



“Berhati-hatilah dengan ragi orang Farisi dan ragi Herodes.”

¹⁶Kemudian mereka membincangkannya satu sama lain dan berkata,

“Dia berkata begitu kerana kita tidak membawa roti.”

¹⁷Yesus mengetahui apa yang dibincangkan mereka lalu Dia bertanya,

“Mengapa kamu memperbincangkan hal tidak membawa roti? Tidakkah kamu tahu dan faham lagi? Begitu tumpulkah hatimu? ¹⁸Kamu ada mata, tidakkah kamu melihat? Kamu ada telinga, tidakkah kamu mendengar?



Tidakkah kamu ingat ¹⁹bagaimana Aku memecah-mecahkan lima buku roti untuk lima ribu orang? Berapa bakul lebihan makanan yang kamu kumpulkan?”

“Dua belas,” jawab mereka.


²⁰“Dan apabila Aku memecah-mecahkan tujuh buku roti untuk empat ribu orang, berapa bakul lebihan makanan yang kamu kumpulkan?”

“Tujuh,” jawab mereka.

²¹Lalu Yesus berkata kepada mereka, “Kamu masih belum faham lagi?”

Yesus menyembuhkan seorang buta

²² Yesus dan murid-murid-Nya tiba di Betsaida. Beberapa orang membawa seorang buta kepada Yesus dan memohon agar Dia menyentuhnya. ²³ Yesus memegang tangan orang buta itu lalu memimpinnya ke luar dari pekan itu.



Yesus meludahi mata orang buta itu. Kemudian Dia meletakkan tangan-Nya pada orang itu lalu bertanya,

“Adakah kamu melihat apa-apa?”



²⁴ Orang itu memandang ke hadapan lalu berkata,

“Aku nampak orang, rupa mereka seperti pokok berjalan.”



²⁵ Sekali lagi Yesus meletakkan tangan-Nya pada mata orang itu. Setelah orang itu berusaha untuk melihat, kali ini penglihatannya cukup terang dan matanya telah sembuh. ²⁶ Yesus pun menyuruhnya pulang sambil berkata,

“Jangan masuk lagi ke pekan itu.”



Pengakuan Petrus




27 Setelah itu, Yesus dan murid-murid-Nya pergi ke pekan-pekan di sekitar Kaisarea Filipi. Di tengah jalan Yesus bertanya kepada mereka,

“Menurut orang, Aku ini siapa?”


28 Mereka menjawab,

“Ada yang berkata, Yohanes Pembaptis; yang lain berkata, Elia; ada pula yang berkata, seorang daripada nabi.”



29 “Tetapi menurut kamu, Aku ini siapa?”

tanya Yesus.



Petrus menjawab,

“Engkau ialah Kristus.”

30 Dengan tegasnya Yesus melarang mereka memberitahu sesiapa pun tentang diri-Nya.





Yesus memberitahu tentang kematian-Nya[†]



³¹ Kemudian Yesus mula mengajar mereka bahawa Anak Manusia harus banyak menanggung kesengsaraan serta ditolak oleh para pemimpin masyarakat, ketua imam dan ahli Taurat. Dia akan dibunuh, tetapi tiga hari kemudian, Dia akan bangkit semula.

³² Yesus mengatakan perkara ini dengan terus terang. Oleh itu, Petrus menarik Yesus ke tepi lalu menegur Dia. ³³ Yesus berpaling memandang murid-murid-Nya lalu menegur Petrus,

“Pergilah dari sini, Iblis!
Kamu tidak berfikir secara Allah,
tetapi secara manusia.”



³⁴ Setelah itu, Yesus memanggil murid-murid-Nya dan orang ramai di situ lalu berkata kepada mereka,

“Jika seseorang hendak mengikut-Ku, dia harus menyangkal dirinya, memikul salib dan mengikut-Ku. ³⁵ Sesiapa

yang mempertahankan hidupnya, akan kehilangan hidupnya. Tetapi sesiapa yang mengorbankan hidup untuk-Ku dan untuk Injil, akan menyelamatkan hidupnya itu. ³⁶ Apa gunanya jika seseorang memiliki seluruh dunia tetapi kehilangan hidupnya? ³⁷ Dapatkah hidup itu ditukar dengan apa pun? ³⁸ Jika seseorang malu mengakui Aku dan perkataan-Ku dalam kalangan angkatan yang cabul dan berdosa ini, Anak Manusia juga akan malu mengakuinya ketika Dia datang dalam kemuliaan Bapa-Nya diiringi para malaikat suci.”

[†] Kematian Yesus: Lihat nota **Pautan Iman** pada muka surat 65.

† Bapa, Anak dan Roh Kudus

Pautan Iman



Doktrin Tritunggal yang merujuk kepada Bapa, Anak dan Roh Kudus sering digunakan untuk mengelirukan orang Kristian dengan mendakwa orang Kristian menyembah 3 Tuhan. Kenyataannya, orang Kristian **TIDAK** pernah percaya kepada 3 Tuhan. Malah, orang Kristian **MENOLAK** ajaran itu!

Sebagai satu agama Tauhid di dunia, doktrin Tritunggal Kristian berpegang teguh kepada konsep Allah Yang Satu. Tetapi dalam penyatuan ke-Allahan itu, ada tiga keperibadian atau personifikasi. Pendapat orang yang mendakwa orang Kristian menyembah tiga Tuhan itu melihat dari segi Matematik: $(1 + 1 + 1 = 3)$ Tetapi Allah adalah satu kesatuan yang berhubungan dan berkait: $(1 \times 1 \times 1 = 1)$ Malah kita semua percaya bahawa Allah itu kekal (infiniti, ∞), di mana dalam bentuk Matematik, apabila dicampur atau didarab, jawapannya tetap ∞ !

$$\infty + \infty + \infty = \infty$$
$$\infty \times \infty \times \infty = \infty$$

Alkitab telah menerangkan tentang Tritunggal:

1. **Hanya ada satu Allah** (Ulangan 6:4; 1 Korintus 8:4; 1 Tim 2:5; Galatia 3:20)
2. **Tritunggal terdiri daripada tiga Peribadi** (Kejadian 1:1, 1:26, 3:22, 11:7; Yesaya 6:8, 48:16, 61:1; Matius 3:16-17, 28:19; 2 Korintus 13:14)
3. **Setiap anggota Tritunggal adalah Allah**

Bapa adalah Allah


(Yohanes 6:27; Roma 1:7; 1 Petrus 1:2)

Anak adalah Allah

(Yohanes 1:1, 14; Roma 9:5; Ibrani 1:8)

Roh Kudus adalah Allah

(Kisah Para Rasul 5:3-4; 1 Korintus 3:16
Roma 8:9; Yohanes 14:16-17)



Tritunggal bukan sesuatu konsep untuk diterangkan dengan sempurna, tetapi sesuatu perhubungan untuk dialami dengan penuh rendah hati. Hanya apabila kita sudah percaya kepada Yesus — melalui-Nya kita mengenal Allah Bapa, diangkat menjadi anak-anak-Nya, dan diberi Roh Kudus untuk menjadi Penghibur kita — barulah kita benar-benar dapat mengerti Allah Tritunggal yang bekerja di dalam hidup kita. Yesus yang kita kenal sebagai Tuhan itulah yang membolehkan seorang Kristian mengalami penyertaan “kasih kurnia Tuhan Yesus, kasih Allah Bapa dan persekutuan Roh Kudus” (2 Korintus 13:14). Orang yang tidak percaya kepada Yesus tidak akan mengerti kenyataan ini!

Bab 9

¹Yesus berkata lagi,

“Sesungguhnya, Aku berkata kepadamu, ada beberapa orang di sini yang tidak akan menemui maut sebelum melihat kerajaan Allah datang dengan kuasa.”



Penjelmaan



²Enam hari kemudian, Yesus membawa Petrus, Yakobus, dan Yohanes, pergi bersunyi di atas sebuah gunung yang tinggi. Di situ Yesus berubah rupa di hadapan mata mereka.

³Pakaian-Nya menjadi putih berkilau-kilauan laksana salji, tiada siapa di bumi ini dapat memutihkan kain sehingga seputih itu. ⁴Elia dan Musa muncul pula di hadapan mereka lalu bercakap dengan Yesus. ⁵Lalu Petrus berkata kepada Yesus,

“Rabbi, baik sekali kami ada di sini. Biarlah kami dirikan tiga buah khemah – satu untuk Engkau, satu untuk Musa, dan satu lagi untuk Elia.”

⁶(Sebenarnya Petrus tidak tahu apa yang hendak dikatakannya, kerana mereka amat ketakutan.)




Markus 9:7-13

⁷ Segumpal awan meliputi mereka. Suatu suara terdengar dari dalam awan itu,



⁸ Tiba-tiba, ketika mereka memandang sekeliling, mereka tidak lagi melihat sesiapa di situ bersama mereka, selain Yesus.



⁹ Sewaktu berjalan turun dari gunung itu, Yesus memperingatkan mereka supaya tidak memberitahu sesiapa segala yang telah dilihat mereka, sehingga Anak Manusia bangkit daripada kematian.

¹⁰ Mereka mentaati pesan itu, sambil bertanya-tanya apa maksud “bangkit daripada kematian.”

¹¹ Mereka bertanya kepada Yesus,

“Mengapa ahli Taurat berkata Elia mesti datang dahulu?”


¹² Yesus menjawab,

“Benar, Elia akan datang dahulu dan memulihkan segala sesuatu. Tetapi bagaimana dengan apa yang tersurat

tentang Anak Manusia, bahawa Dia akan banyak menanggung penderitaan dan penghinaan? ¹³ Aku berkata kepadamu, Elia sudah pun datang dan orang berbuat sesuka hati kepadanya, seperti yang tersurat tentang dirinya.”



Yesus menyembuhkan seorang anak lelaki yang bisu



¹⁴ Apabila mereka pulang mendapatkan para murid yang lain, mereka melihat ramai orang di situ. Beberapa orang ahli Taurat sedang bersoal jawab dengan para murid Yesus. ¹⁵ Sebaik-baik orang ramai itu melihat Yesus, mereka amat kagum lalu berlari menyambut-Nya.

¹⁶ Yesus bertanya kepada murid-murid-Nya,

“Tentang apa kamu bersoal jawab dengan mereka?”

¹⁷ Seorang daripada orang ramai itu menjawab,

“Guru, aku membawa anakku kepada murid-murid-Mu. Anakku dirasuk oleh roh yang membuatnya bisu. ¹⁸ Apabila roh itu menyerangnya, dia menghempas-hempas tubuhnya ke tanah, mulutnya berbuih, giginya mengertak dan badannya menjadi kaku. Aku memohon murid-murid-Mu menghalau roh itu tetapi mereka tidak dapat melakukannya.”




¹⁹ Yesus berkata kepada mereka,

“Hai angkatan yang tidak percaya! Berapa lama lagikah Aku mesti ada bersamamu? Berapa lama lagikah Aku mesti bersabar denganmu? Bawa anak itu ke mari.”

²⁰ Mereka pun membawa anak itu kepada Yesus. Sebaik-baik roh itu melihat Yesus, ia pun membuat anak itu sawanⁿ, lalu jatuh berguling-guling ke tanah, mulutnya berbuih.





21 Yesus bertanya kepada bapa anak itu,

“Sejak bila dia begini?”

Bapa anak itu menjawab,

“Sejak dia kecil lagi. 22 Sudah berkali-kali roh itu coba membunuhnya dengan membuangnya ke dalam api atau air. Kasihanlah kami dan tolonglah kami, kalau Engkau dapat menolong.”

23 Yesus berkata kepadanya,


“Apa katamu? Kalau Engkau dapat? Segala sesuatu mungkin bagi orang yang percaya.”

24 Bapa itu segera berseru,

“Aku percaya; tolonglah aku yang kurang percaya ini!”

25 Ketika Yesus melihat orang ramai datang berkerumun, Dia membentak roh jahat itu,

“Hai roh bisu tuli, Aku perintahkan kamu keluar daripada anak ini dan jangan memasukinya lagi.”



26 Roh itu menjerit dan membuat tubuh anak itu terkejut-kejut, lalu keluar daripada anak itu.




Anak itu kelihatan seperti mayat lalu semua orang berkata,

“Dia sudah mati.”

²⁷ Tetapi Yesus memegang tangannya dan menolongnya bangun. Anak itu pun berdiri.



²⁸ Selepas itu, Yesus masuk ke rumah. Ketika tiada lagi orang lain di situ, murid-murid-Nya bertanya kepada-Nya,



“Mengapa kami tidak dapat menghalau roh itu?”

²⁹ Yesus menjawab,

“Jenis ini tidak dapat dihalau dengan cara apa-apa pun, kecuali dengan doa.”

³⁰ Setelah itu, Yesus dan murid-murid-Nya beredar dari situ dan meneruskan perjalanan melalui Galilea. Dia tidak mahu orang tahu Dia di mana ³¹ kerana Dia sedang mengajar murid-murid-Nya. Dia berkata kepada mereka,

“Anak Manusia akan diserahkan ke dalam tangan manusia dan akan dibunuh, tetapi selepas tiga hari Dia akan bangkit semula.”



³² Mereka tidak faham erti kata-kata itu tetapi takut hendak bertanya kepada Yesus.

Siapa yang terbesar?



³³ Mereka tiba di Kapernaum. Setelah tiba di rumah, Yesus bertanya kepada murid-murid-Nya,

“Apa yang kamu persoalkan di jalan tadi?”

³⁴ Mereka tidak menjawab, kerana dalam perjalanan mereka telah mempersoalkan siapa yang terbesar.

³⁵ Yesus duduk lalu memanggil murid-Nya yang dua belas itu. Dia berkata kepada mereka,

“Kalau sesiapa ingin menjadi yang terdahulu, dia mestilah menjadi yang terakhir dan hamba kepada semua orang.”



³⁶ Selepas itu, Dia memanggil seorang kanak-kanak dan menyuruhnya berdiri di hadapan mereka semua. Dia mendakap kanak-kanak itu sambil berkata kepada mereka,

“Sesiapa yang menyambut seorang kanak-kanak seperti ini kerana nama-Ku, menyambut-Ku. ³⁷ Sesiapa yang menyambut-Ku bukanlah menyambut-Ku tetapi menyambut Dia yang mengutus-Ku.”

Menghalau roh iblis

³⁸ Yohanes berkata kepada Yesus,

“Guru, kami melihat seorang lelaki menghalau roh-roh iblis dengan nama-Mu, lalu kami larang dia, kerana dia bukan dalam kumpulan kita.”



³⁹ Tetapi Yesus berkata,


“Jangan larang dia, kerana seseorang yang melakukan mukjizat dengan nama-Ku tidak mungkin mencela-Ku sejeurus selepas itu. ⁴⁰ Orang yang tidak menentang kita, memihak kepada kita. ⁴¹ Sesungguhnya, Aku berkata kepadamu, sesiapa yang memberimu secawan air dalam nama-Ku, kerana kamu pengikut Kristus, pasti akan mendapat ganjarannya.”

**Pengakuan Iman Rasuli
(Kredo Rasuli/Syahadat Para Rasul)**

Aku percaya kepada Allah, Bapa yang Mahakuasa,
Pencipta langit dan bumi.
Dan kepada Yesus Kristus, Anak-Nya yang Tunggal, Tuhan kita.
Yang dikandung dari Roh Kudus, lahir dari anak dara Maria.
Yang menderita sengsara di bawah pemerintahan Pontius Pilatus.
Disalibkan, mati dan dikuburkan, turun ke dalam kerajaan maut.
Pada hari yang ketiga bangkit pula dari antara orang mati,
Naik ke syurga, duduk di sebelah kanan Allah Bapa yang Mahakuasa.
Dan dari sana Dia akan datang untuk menghakimi
orang yang hidup dan yang mati.
Aku percaya kepada Roh Kudus, Gereja yang kudus dan am,
Persekutuan orang kudus, pengampunan dosa
Kebangkitan tubuh dan hidup yang kekal.

Amin

Menyebabkan orang lain berdosa



⁴²“Tetapi sesiapa yang menyebabkan seorang daripada kanak-kanak yang percaya kepada-Ku ini berdosa, lebih baiklah baginya jika batu kisar diikatkan ke lehernya dan dia dicampakkan ke dalam laut. ⁴³Jika tanganmu menyebabkan kamu berdosa, potonglah tangan itu! Lebih baik kamu memasuki hidup dalam keadaan kudung sebelah tangan, daripada mempunyai dua tangan tetapi terhumban ke dalam neraka, ke dalam api yang tidak terpadam. ⁴⁴Di sana cacingnya tidak akan mati dan apinya tidak akan padam.

⁴⁵Jika kakimu menyebabkan kamu berdosa, potonglah kaki itu. Lebih baik kamu memasuki hidup dalam keadaan kudung, daripada memiliki dua kaki tetapi terhumban ke dalam neraka. ⁴⁶Di sana cacingnya tidak akan mati dan apinya tidak akan padam.

⁴⁷“Jika matamu menyebabkan kamu berdosa, cunkillah mata itu. Lebih baik kamu memasuki kerajaan Allah dengan sebelah mata sahaja, daripada memiliki dua mata tetapi terhumban ke dalam neraka.

⁴⁸Di sana ‘cacingnya tidak akan mati, dan apinya tidak akan padam.’

⁴⁹Setiap orang akan disaluti api.



⁵⁰“Garam itu baik, tetapi jika menjadi tawar, bagaimanakah garam dapat dimasinkan semula? Adakanlah garam pengukuh dalam dirimu, dan hiduplah rukun damai sesamamu.”

Bab 10

Penceraian


¹ Setelah itu, Yesus beredar dari situ lalu pergi ke daerah Yudea dan daerah di seberang Sungai Yordan. Ramai sekali orang yang datang kepada-Nya, dan seperti biasa, Dia pun mengajar mereka. ² Beberapa orang Farisi datang kepada Yesus dan menduga-Nya. Mereka bertanya,



“Menurut hukum, bolehkah seseorang menceraikan isterinya?”

³ Dia menjawab,

“Apa yang diperintahkan oleh Musa kepadamu?”



⁴ Mereka berkata,

“Musa membenarkan seseorang lelaki menulis surat cerai dan menyuruh isterinya pergi.”

⁵ Yesus menjawab mereka,

“Disebabkan hati kamu begitu tegar, Musa menuliskan peraturan itu. ⁶ Tetapi sejak alam dicipta, Allah ‘telah menjadikan lelaki dan perempuan.’ ⁷ Itulah maka seorang lelaki meninggalkan ibu bapanya dan bersatu dengan isterinya, ⁸ lalu mereka berdua menjadi satu.’ Maka mereka bukan lagi dua tetapi satu. ⁹ Apa yang telah disatukan oleh Allah, janganlah manusia pisahkan.”

¹⁰ Di dalam rumah, murid-murid-Nya bertanya lagi kepada-Nya tentang hal ini.


¹¹ Dia menjawab,

“Sesiapa yang menceraikan isterinya dan berkahwin dengan perempuan lain, berzina. ¹² Begitu juga, jika seseorang wanita menceraikan suaminya dan berkahwin dengan lelaki lain, dia berzina.”

Yesus memberkati kanak-kanak

¹³ Selepas itu, orang membawa kanak-kanak kecil* kepada-Nya supaya Dia menyentuh mereka, tetapi murid-murid-Nya memarahi mereka. ¹⁴ Tetapi apabila Yesus melihat hal itu, Dia sungguh tidak menyenanginya, lalu berkata,

“Biarkan kanak-kanak kecil itu datang kepada-Ku; jangan larang mereka, kerana orang yang seperti itulah yang empunya Kerajaan Allah. ¹⁵ Sesungguhnya, Aku berkata kepadamu, sesiapa yang tidak menerima kerajaan Allah seperti seorang anak kecil, tidak akan masuk ke dalamnya.”



¹⁶ Yesus mendukung dan mendakap kanak-kanak kecil itu, meletakkan tangan-Nya ke atas mereka, dan memberkati mereka.

***Kanak-kanak kecil**

Adakah anak-anak kita sudah diajar tentang Yesus?

Kenapa Yesus menegur murid-murid yang melarang kanak-kanak datang kepada-Nya? Kerana kanak-kanak harus mengenal Yesus dari usia muda. Kata-kata Yesus tidak lapuk dek zaman. Jadi, ketika Dia berkata, “Biarkan kanak-kanak datang kepada-Ku,” ini juga untuk para ibu bapa moden hari ini. Dia memberitahu kita pada hari ini, untuk membawa anak-anak kita kepada-Nya; mengajar mereka tentang Yesus dan memperkenalkan mereka kepada Yesus sebelum mereka diambil oleh keduniaan serta nilai-nilai dan ajaran-ajaran salah yang lain.

Di sisi yang lain, Yesus juga menyatakan bahawa kerajaan Allah adalah milik orang yang datang kepada-Nya seperti kanak-kanak. Ini bermaksud kita harus datang kepada Yesus dengan penuh yakin dan percaya. Apabila semuanya gagal dan kita menghadapi jalan buntu, datanglah kepada Yesus seperti seorang kanak-kanak. Dia peduli, Dia mengerti dan Dia pasti akan menyambut dan memberkati kita, sama seperti Dia mendukung dan mendakap kanak-kanak kecil yang datang kepada-Nya.



Orang yang kaya itu



¹⁷ Ketika Dia sedang melangkah ke jalan, ada seorang datang berlari-lari, berlutut kepadanya dan bertanya,

“Wahai Guru yang baik, apakah yang harus aku buat untuk mewarisi hidup yang kekal?”

¹⁸ Yesus berkata kepadanya


“Mengapa kamu mengatakan Aku baik? Tiada siapa yang baik kecuali Allah. ¹⁹ Engkau mengetahui perintah-perintah Allah: ‘Jangan berzina, jangan membunuh, jangan mencuri, jangan memberi kesaksian palsu, jangan mungkir, hormatilah ibu bapamu.’”

²⁰ Orang itu menjawab,

“Guru, semua ini telah kutaati dari usia muda lagi.”


²¹ Yesus memandangnya dengan penuh kasih lalu berkata,

“Ada satu kekuranganmu. Pergilah, jual segala yang ada padamu dan sedekahkan kepada orang miskin, maka kamu akan mendapat harta di syurga. Sesudah itu datanglah dan ikut Aku.”



²² Tetapi orang itu sedih mendengar kata-kata ini lalu pergi dengan dukacita, kerana dia mempunyai banyak harta.

²³Kemudian Yesus memandang sekeliling dan berkata kepada murid-murid-Nya,



“Betapa susahnya bagi orang kaya memasuki kerajaan Allah!”

²⁴Para murid-Nya kehairanan mendengar kata-kata-Nya. Tetapi Yesus berkata lagi,

“Anak-anak-Ku, betapa susahnya untuk memasuki kerajaan Allah! ²⁵Lebih mudah bagi seekor unta memasuki lubang jarum daripada seorang kaya memasuki kerajaan Allah.”

²⁶Para murid-Nya berasa sungguh hairan, lalu berkata sama sendiri, “Kalau begitu, siapakah yang dapat diselamatkan?”

²⁷Sambil memandang mereka Yesus menjawab,

“Bagi manusia hal itu mustahil, tetapi tidak bagi Allah; tidak ada satu pun yang mustahil bagi Allah.”*

²⁸Lalu Petrus berkata kepada-Nya,

“Kami telah meninggalkan segala-galanya untuk mengikut-Mu!”

²⁹Yesus menjawab,

“Sesungguhnya Aku berkata kepadamu, setiap orang yang telah meninggalkan rumah, saudara lelaki, saudara perempuan, ibu bapa, anak-anak, atau ladang



untuk-Ku dan untuk Injil ³⁰pasti akan menerima seratus kali ganda dalam dunia ini (rumah, saudara lelaki, saudara perempuan, ibu, anak-anak dan ladang, serta penganiayaan) dan pada kemudian hari, hidup kekal. ³¹Tetapi ramai orang yang terdahulu akan menjadi terakhir, dan yang terakhir akan menjadi yang terdahulu.”

Yesus memberitahu lagi tentang kematian-Nya[†]



³² Ketika mereka dalam perjalanan, menuju ke Yerusalem, dan Yesus mendahului mereka, maka mereka sungguh takjub. Sambil mengikut-Nya, mereka berasa takut. Kemudian Dia membawa murid-Nya yang dua belas itu ke samping lalu memberitahu mereka apa yang akan terjadi kepada-Nya. ³³ Kata-Nya,



“Dengarlah, kita sekarang pergi ke Yerusalem. Anak Manusia akan dikhianati dan diserahkan kepada ketua-ketua imam dan

ahli-ahli Taurat. Mereka akan menjatuhkan hukuman mati kepada-Nya dan menyerahkan-Nya ke tangan bangsa asing. ³⁴ Mereka akan mengejek-Nya, menyebat-Nya, meludahi-Nya, dan membunuh-Nya. Pada hari ketiga Dia akan bangkit semula.”

***Tidak ada yang mustahil bagi Allah**

Pegangan Hidup



Konteks pernyataan ini ialah tentang penyelamatan manusia.

Sangat mustahil bagi manusia untuk menyelamatkan diri mereka dengan kebajikannya sendiri. Tidak ada hukum atau ajaran agama yang dapat memberikan kehidupan kekal. Berbuat baik dan mengumpul pahala tidak akan menjamin manusia masuk ke dalam kerajaan Allah. Hanya kasih kurnia yang ditawarkan oleh Allah melalui Yesus yang dapat melakukan itu.

“Tidak ada yang mustahil bagi Allah” merujuk kepada kuasa Allah yang maha besar dan tidak ada batasnya (Ayub 11:7-11, 37:23; Wahyu 4:8). Itu tidak bermakna bahawa Tuhan mampu melakukan apa sahaja termasuk perkara yang tidak rasional atau tidak sempurna. Allah tidak mungkin melakukan perkara-perkara yang bertentangan dengan sifat-Nya, seperti berdusta, tidak setia atau menyangkal diri-Nya (Ibrani 6:18; 2 Timotius 2:13; Titus 1:2). Penyelamatan adalah sangat mungkin bagi Tuhan. Adakah anda juga tekun mendoakan penyelamatan keluarga atau teman-teman anda? Percayalah bahawa tidak ada yang mustahil bagi Allah. Dia pasti akan menyelamatkan mereka sesuai dengan rancangan dan waktu-Nya.

Kota Yerusalem di Zaman Yesus

Istana Herodes.

Pontius Pilatus tinggal di sini apabila dia datang ke Yerusalem.

Lembah Hinnom.

Tempat pembakaran sampah, di mana api sendiri membakar.


Tempat Penyaliban.

Terletak di luar kota

Kubu Antonia.

Berek tentera Roma

Kolam Baithasda



Bait Suci.

Puncak Bait Suci.

Iblis menggoda Yesus untuk terjun ke Lembah Kidron.

Kolam Siloam

Tembok Kota

Taman Getsemani.

Terletak di kaki Bukit Zaitun

Permintaan Yakobus dan Yohanes



³⁵ Kemudian Yakobus dan Yohanes, anak-anak Zebedeus, datang kepada-Nya lalu berkata,

“Guru, kami mahu Engkau membuat apa-apa yang kami minta untuk diri kami.”

³⁶ Yesus bertanya kepada mereka,


“Apa yang kamu mahu Aku buat untukmu?”

³⁷ Mereka berkata kepada-Nya,

“Kurniailah kami duduk di kiri dan kanan-Mu dalam kemuliaan-Mu.”

³⁸ Tetapi Yesus berkata kepada mereka,

“Kamu tidak tahu apa yang kamu minta itu. Sanggupkah kamu minum dari cawan yang Kuminum, dan dibaptiskan dengan baptisan yang Kuterima?”



“Sanggup,” jawab mereka.

Yesus berkata kepada mereka,

“Memang kamu akan minum dari cawan yang Kuminum dan dibaptiskan dengan baptisan yang Kuterima. ⁴⁰ Tetapi untuk duduk di kiri dan kanan-Ku bukanlah Aku memberikannya, tetapi tempat itu milik mereka yang telah disediakan bagi mereka.”

⁴¹ Apabila sepuluh murid Yesus yang lain mendengar perkara itu, mereka marah kepada Yakobus dan Yohanes. ⁴² Tetapi Yesus memanggil mereka kepada-Nya lalu berkata,

“Kamu tahu bahawa orang yang dianggap sebagai pemerintah bangsa asing memerintah rakyat dengan kuku besi, dan orang besar melaksanakan kekuasaan ke atas mereka. ⁴³ Ini tidak harus berlaku dalam kalanganmu. Sesiapa yang ingin menjadi orang besar dalam kalanganmu mestilah melayan kamu. ⁴⁴ Sesiapa yang ingin menjadi orang yang pertama haruslah menjadi hamba kepada semua. ⁴⁵ Demikianlah Anak Manusia juga datang bukan untuk dilayan tetapi untuk melayan, dan untuk menyerahkan nyawa-Nya sebagai tebusan bagi ramai orang.”

Yesus menyembuhkan Bartimeus

⁴⁶Setelah itu, mereka tiba di Yerikho. Kemudian, ketika Dia keluar dari situ dengan murid-murid-Nya dan orang ramai itu, seorang buta bernama Bartimeus anak Timeus, sedang duduk mengemis di tepi jalan.

⁴⁷Ketika dia mendengar bahawa yang lalu itu Yesus orang Nazaret, dia berseru,

“Yesus, Anak Daud, kasihanilah aku!”



⁴⁸Ramai orang memarahinya dan menyuruhnya diam, tetapi dia semakin kuat berseru,

“Anak Daud, kasihanilah aku!”


⁴⁹Oleh itu, Yesus berhenti dan memberikan perintah supaya dia dipanggil. Mereka pun memanggil orang buta itu sambil berkata,

“Bergembiralah! Dan bangkitlah! Dia memanggilmu.”

⁵⁰Orang buta itu mencampakkan jubahnya ke tepi lalu bangkit dan pergi kepada Yesus.

⁵¹Kata Yesus kepadanya,

“Apa yang kamu mahu Kubuat untukmu?”



Jawab orang itu, “Rabbi, aku ingin melihat.”



⁵²Yesus menjawab,

“Pergilah, imanmu telah menyembuhkanmu.”

Serta-merta orang itu dapat melihat, lalu mengikut Yesus dalam perjalanan-Nya.

†Kematian Yesus

Pautan
Iman



Inti daripada penyangkalan kematian, pemakaman dan kebangkitan Yesus adalah kerana kumpulan orang yang menyangkal itu percaya bahawa Allah tidak akan membenarkan rasul besar-Nya mati dalam keadaan yang sangat memalukan. Tetapi, penting bagi kita ketahui bahawa tidak ada orang yang sangsi akan kematian Yesus sebelum abad ke-7!

A. Bukti Sejarah

Ribuan manuskrip dan catatan sejarah membenarkan peristiwa kematian Yesus di kayu salib, dan perihal orang Kristian yang percaya kepada Kristus yang bangkit dari kematian. Catatan ahli sejarah kuno itu termasuklah Lucian dari Samosata (*The Death of Peregrine*), Josephus (*Jewish Antiquities*), Cornelius Tacitus (*The Annals*), Talmud Sanhedrin dan orang Kristian awal yang menggunakan salib sebagai lambang dalam perjamuan suci untuk mengenang kematian Guru mereka.

B. Bukti dari Alkitab

Ada ramai saksi mata yang menyaksikan serta mengesahkan kematian Yesus di kayu salib pada hari penyaliban-Nya (Markus 15:39-41). Maria Ibu Yesus, ada di sisi salib itu ketika Yesus menghembuskan nafas terakhir. Jenazah Yesus kemudian dituntut dan dimakamkan oleh Yusuf dari Arimatea yang pergi menghadap Pontius Pilatus (Markus 15:42-47). Malah para kepala imam dan orang Farisi juga ingat akan kata-kata Yesus tentang kematian dan kebangkitan-Nya, sehingga mereka meminta tentera Roma untuk mengawal makam Yesus (Matius 27:63-64).


Bagaimana pula dengan teori penggantian, teori pengsan (mati suri), pendapat Yesus diangkat ke syurga sejurus sebelum disalibkan? Semua itu dapat dibidas dengan beberapa pertanyaan:

1. Kenapa Allah harus melibatkan seorang yang tidak bersalah menggantikan Yesus di kayu salib?
2. Kenapa Allah Yang Maha Bijaksana dan Maha Kuasa harus menggunakan muslihat untuk menyelamatkan nabi besar-Nya?
3. Kenapa orang yang mau disalibkan itu tidak membantah dan menjerit apa lagi bila tangan dan kakinya mahu dipakukan?

Alkitab mengatakan, “Kristus juga telah mati sekali untuk selama-lamanya kerana dosa kita. Dia yang benar telah menderita untuk orang yang tidak benar supaya Dia dapat membawa kita kepada Allah. Dia telah dibunuh secara jasmani tetapi dihidupkan secara Roh.” (1 Petrus 3:18). Menyangkal penyaliban Yesus bererti menyangkal sebab mengapa Yesus datang ke dunia!

Bab 11

Yesus masuk ke Yerusalem



¹ Apabila mereka sudah berhampiran Yerusalem, di Betfage dan Betania, di Bukit Zaitun, Yesus mengutus dua orang murid-Nya, ² kata-Nya,


“Pergilah ke kampung yang di hadapan itu. Sebaik-baik kamu masuk, kamu akan mendapati seekor anak keldai yang belum pernah ditunggang, tertambat di situ. Lepaskannya dan bawa ke

mari. ³ Jika sesiapa bertanya kepadamu, ‘Mengapa kau berbuat demikian?’ katakan, ‘Tuhan memerlukannya, dan Dia akan segera memulangkannya.’”

⁴ Mereka pun pergi dan mendapati anak keldai itu tertambat di pintu di tepi jalan, lalu mereka melepaskannya. ⁵ Beberapa orang yang berdiri di situ bertanya kepada mereka,


“Apa yang kamu buat, melepaskan anak keldai itu?”


⁶ Mereka menjawab seperti yang diperintahkan oleh Yesus, lalu mereka




dibenarkan pergi.

⁷ Mereka membawa anak keldai itu kepada Yesus dan mengalasnya dengan jubah mereka. Yesus pun duduk di atas anak keldai itu.






⁸ Ramai orang membentangkan jubah mereka di atas jalan. Yang lain memotong dahan rimbus daripada pokok-pokok di situ dan meletakkannya sepanjang jalan. ⁹ Setelah itu, mereka yang berjalan di hadapan dan yang mengikut dari belakang berseru,



“Hosana!”

“Diberkatilah Dia yang datang dengan nama Tuhan!” (Mazmur 118:26)



¹⁰ “Diberkatilah kerajaan bapa kita Daud! Yang datang dengan nama Allah!”



“Hosana di tempat yang maha tinggi!”

¹¹ Yesus masuk ke Yerusalem dan terus masuk ke dalam Bait Suci. Setelah Dia melihat semuanya, kerana hari sudah lewat petang, Dia pun pergi ke Betania dengan murid-Nya yang dua belas itu.



Yesus membersihkan Bait Suci

¹² Esoknya, setelah mereka keluar dari Betania, Yesus berasa lapar. ¹³ Dari jauh Dia melihat sebatang pokok ara yang berdaun. Dia mendekatinya untuk melihat kiranya pokok itu berbuah. Tetapi Dia mendapati daun sahaja di pokok itu, kerana pada masa itu bukan musim buah ara. ¹⁴ Oleh itu Yesus berkata kepada pokok itu.



“Tiada siapa akan makan buahmu lagi selama-lamanya.”


Para murid-Nya mendengar kata-kata itu.



¹⁵ Apabila sampai di Yerusalem, Yesus masuk ke Bait Suci dan mengusir orang yang berjual beli di dalam Bait Suci. Dia menterbalikkan meja pengurup wang dan tempat duduk penjual burung merpati. ¹⁶ Dia tidak membenarkan siapa pun mengangkat barangan melalui Bait Suci.



¹⁷ Kemudian Dia mengajar mereka, kata-Nya,



“Tidakkah tersurat:

‘Rumah-Ku
akan dipanggil
rumah doa bagi
semua bangsa?’
(Yesaya 56:7)


Tetapi kamu telah
menjadikannya
‘sarang pencuri.’”




¹⁸ Ahli-ahli Taurat dan ketua-ketua imam mendengarnya lalu mencari jalan hendak membinasakan Yesus, kerana mereka takut kepada-Nya, memandangkan semua orang mengagumi ajaran-Nya.



¹⁹ Setelah lewat petang, Yesus keluar dari kota itu.



Bait Allah/Bait Suci di Kota Yerusalem



Kubu Antonia.
Berek tentera Roma.

Bait Suci
Di dalamnya terletak Tempat Suci dan Tempat Yang Maha Suci

Halaman untuk wanita.
Di sinilah Yesus melihat batu miskin memasukkan wang persembahan ke dalam kotak persembahan

Gerbang Indah

Gerbang Nikanor

Tembok Luar.
5m tebal.

4 Pelataran Tertutup.
Satu untuk menyimpan kayu api; satu untuk menyimpan minyak, wain dan garam; satu untuk pesakit kusta yang telah disembuhkan; dan satu untuk para penazar (orang suci).

Tembok batu rendah.
Ada notis pada tembok ini di mana orang bukan Yahudi yang melintasi bahagian ini akan dibunuh.

Serambi Salomo.
Di sini orang Yahudi cuba merejam Yesus apabila Dia berkata "Aku dan Bapa adalah satu".

Halaman untuk orang bukan Yahudi.

Halaman untuk orang Israel (lelaki)

Pelataran Para Imam.
Hanya imam yang boleh masuk ke ruang ini. Tempat haiwan dikorbankan di atas satu batu besar. Jadi tempat ini sangat bising dan busuk.

Puncak (Menara) Bait Suci.
Iblis menggoda Yesus untuk terjun ke Lembah Kidron.

Rumah Cuci.
Untuk upacara pembersihan.

Tangga batu
Pintu masuk dari sebelah selatan.

Serambi Raja.
Tempat perdagangan binatang dan burung untuk korban bakaran. Kadang-kadang ia melimpah ke Halaman untuk orang bukan Yahudi, sehingga membuatnya seperti pasar.

Yesus mengutuk pokok ara



²⁰ Pada pagi esoknya, ketika mereka lalu di situ, mereka melihat pokok araⁿ itu telah layu kering daripada akarnya.
²¹ Petrus teringat lalu berseru,

“Rabbi, lihat! Pokok ara yang Engkau sumpah itu telah mati.”

²² Yesus berkata kepada murid-murid-Nya,

“Berimanlah kepada Allah.

²³ Sesungguhnya, Aku berkata kepadamu, jika sesiapa berkata kepada gunung, ‘Beralihlah dan terhumbanlah ke laut,’ tanpa ragu dalam hatinya dan dengan sepenuh kepercayaan bahawa apa yang dikatakannya akan berlaku, maka akan terjadilah seperti kata-katanya itu.”



²⁴ “Oleh itu, Aku berkata kepadamu, apa sahaja yang kamu minta dalam doa, percayalah kamu akan menerimanya, maka kamu akan mendapatnya.
²⁵ Setiap kali kamu berdoa, jika ada sesiapa yang bersalah terhadapmu, ampunilah dia, supaya Bapamu di syurga juga akan mengampunkan kesalahanmu. ²⁶ Tetapi jika kamu tidak mengampuni, Bapamu di syurga juga tidak akan mengampunkan kesalahanmu.”

11:20 Pokok ara: Pokok ara biasanya berbuah dua kali setahun dan buahnya boleh dijadikan makanan. Tumbuhan ini lazimnya akan menggugurkan semua daunnya pada musim dingin, tetapi mula bertumbuh lagi pada bulan Februari. Daun-daunnya akan tumbuh lebat di bulan April. Penyataan kekecewaan Yesus kerana tidak mendapat buah pada pokok ara (Markus 11:13-14, 20-21) lalu menyumpah pokok itu haruslah difahami secara simbolik sebagai kekecewaan Yesus terhadap kerohanian Israel yang tidak berbuah.

Kekuasaan Yesus dipersoalkan

²⁷ Selepas itu, mereka masuk semula ke Yerusalem. Sedang Dia berjalan di dalam Bait Suci, ketua-ketua imam, ahli-ahli Taurat dan tua-tua datang kepada-Nya.

²⁸ Mereka berkata kepada-Nya,

“Dengan kuasa apakah Kamu melakukan perkara-perkara ini? Dan siapakah yang memberi-Mu kuasa untuk melakukannya?”



²⁹ Tetapi Yesus menjawab,

“Aku juga akan bertanya satu soalan kepadamu. Jawablah soalan-Ku, maka Aku akan menyatakan kepadamu dengan kuasa apa Aku melakukan perkara-perkara itu. ³⁰ Baptisan Yohanes daripada syurga atau daripada manusia? Jawablah soalan-Ku!”



³¹ Mereka pun berbincang sesama sendiri,

“Kalau kita berkata, ‘Daripada syurga’ Dia akan berkata, ‘Kalau begitu, mengapa kamu tidak percaya kepadanya?’ ³² Tetapi, apa pula kalau kita berkata, ‘Daripada manusia!’”

(Mereka takut akan orang ramai itu yang semuanya menganggap Yohanes seorang nabi.)

³³ Oleh itu, mereka menjawab,

“Kami tidak tahu.”



Yesus berkata,

“Aku pun tidak akan memberitahumu dengan kuasa apa Aku melakukan perkara-perkara ini.”

Bab 12

Ibarat tentang penyewa ladang

¹ Setelah itu, Dia mula berkata-kata kepada mereka melalui ibarat:



“Seorang peladang menanam anggur, memasang pagar sekeliling ladangnya, menggali lubang untuk tempat memeras anggur, dan membina menara tempat berkawal.



Kemudian dia menyewakan ladang anggur itu kepada beberapa orang lalu pergi ke negeri lain.



² Apabila tiba musim memetik, peladang itu menghantar seorang hambanya untuk meminta bahagiannya daripada hasil ladang anggur itu.



³ Tetapi para penyewa ladang menangkap dan memukul hamba itu lalu menyuruhnya pergi dengan tangan kosong. ⁴ Peladang itu menghantar seorang lagi hambanya. Mereka memukulnya, menyebabkannya luka di kepala dan menyuruhnya pergi setelah diperlakukan sebegitu kejinya. ⁵ Selepas itu, dia menghantar seorang lagi hambanya, dan mereka membunuh hamba itu. Ramai lagi dihantar, ada yang dibunuh dan ada yang dipukul.



⁶Oleh yang demikian, kerana dia masih ada seorang anak yang amat dikasihinya, dia menghantarnya sebagai utusan terakhir, sambil berkata dalam hatinya, 'Mereka akan menghormati anakku.'



⁷Tetapi para penyewa ladang berkata sesama sendiri,

'Ini warisnya. Mari kita bunuh dia, supaya harta warisannya menjadi milik kita.'



⁸Mereka pun menangkap dan membunuhnya lalu mencampakkannya ke luar ladang itu."⁹"Jadi, apa yang akan dilakukan oleh tuan ladang anggur itu?"



Dia akan datang dan membinasakan para penyewa itu, lalu menyerahkan ladang anggur itu kepada orang lain.




¹⁰Belum pernahkah kamu baca dalam Kitab Suci:

'Batu yang dibuang oleh pembina telah menjadi batu penjuru;

¹¹Inilah perbuatan Tuhan, sungguh hebat di mata kami.'?"

(Mazmur 118:22-23)

¹²Mereka cuba menangkap Yesus kerana mereka tahu ibarat itu ditujukan terhadap mereka. Tetapi mereka takut akan orang ramai. Oleh itu, mereka meninggalkan-Nya dan pergi dari situ.



Membayar cukai kepada Kaisar

¹³ Kemudian mereka menghantar kepada-Nya beberapa orang Farisi dan golongan Herodes, untuk memerangkap-Nya melalui kata-kata-Nya. ¹⁴ Orang yang dihantar itu berkata kepada-Nya,



“Guru, kami tahu bahawa Engkau ikhlas. Engkau tidak takut kepada sesiapa pun kerana Engkau tidak pilih kasih, hanya mengajar cara Allah berdasarkan yang benar. Wajarkah membayar cukai kepada Kaisar atau tidak? Patutkah kami bayar, ataupun tidak?”

¹⁵ Tetapi Yesus tahu bahawa mereka itu munafik lalu berkata,

“Mengapa kamu menduga-Ku? Bawakan sekeping wang dinar^a untuk Kulihat.”

¹⁶ Mereka pun membawakannya kepada Yesus dan Dia pun bertanya kepada mereka,

“Gambar dan nama siapakah ini?”



“Kaisar,” jawab mereka.



¹⁷ Lalu Yesus berkata kepada mereka,

“Berikan milik Kaisar kepada Kaisar, dan milik Allah kepada Allah.”


Mereka tercengang mendengar kata-kata-Nya.

12:15 Dinar: Mata wang perak yang mempunyai gambar Kaisar. Nilainya lebih kurang sama dengan upah sehari untuk buruh tani (Matius 20:2). Mata wang ini juga setara dengan dirham Yunani yang beredar di kalangan masyarakat Helenis (orang Yahudi yang lebih berbahasa Yunani daripada bahasa Ibrani) pada masa itu.

Perkahwinan pada hari kebangkitan

¹⁸ Selepas itu orang Sadukiⁿ, yang mengatakan tidak ada kebangkitan, datang kepada Yesus lalu bertanya,

¹⁹ “Guru, Musa menulis untuk kami bahawa jika seseorang lelaki meninggal dunia tanpa anak, saudara lelakinya patutlah berkahwin dengan balunya dan memanjangkan zuriatnya. ²⁰ Kesemuanya ada tujuh adik-beradik lelaki. Yang sulung berkahwin, kemudian meninggal dunia tanpa anak. ²¹ Yang kedua berkahwin dengan balu saudaranya,



kemudian meninggal dunia tanpa anak. Begitu juga yang ketiga. ²² Ketujuh-tujuhnya mengahwini wanita itu dan meninggal dunia tanpa anak. Akhirnya wanita itu juga meninggal dunia. ²³ Jadi, pada hari kebangkitan ketika mereka bangkit daripada kematian, isteri siapakah wanita itu? Ketujuh-tujuhnya pernah mengahwininya.”

²⁴ Yesus menjawab,



“Tidakkah kamu tersilap, kerana kamu tidak memahami baik Kitab Suci mahupun kuasa Allah? ²⁵ Apabila mereka bangkit daripada kematian, mereka tidak berkahwin atau dikahwinkan; mereka seperti malaikat di syurga. ²⁶ Tetapi tentang kebangkitan orang mati, tidakkah kamu baca dalam kitab Musa, bahagian tentang belukar yang bernyala, betapa Allah berfirman kepadanya, ‘Akulah Allah Abraham, Ishak dan Yakub.’ ²⁷ Dia bukanlah Allah orang mati tetapi Allah orang hidup. Oleh itu, kamu tersilap sama sekali!”

12:18 Saduki: Satu mazhab atau golongan pemimpin agama bangsa Israel yang sebahagian besar terdiri daripada imam. Mereka mendasarkan pengajaran mereka pada Kitab Suci Taurat dan menolak segala adat istiadat yang ditokok tambah kemudian (dibandingkan dengan orang Farisi yang berpegang kepada Taurat Musa dan pada adat istiadat nenek moyang, yang menuntut ketaatan mutlak kepada seluruh hukum dan peraturan). Orang Saduki tidak percaya kepada kebangkitan atau kewujudan malaikat. Golongan ini sangat terbuka kepada kebudayaan Yunani (Lukas 20:27).

Perintah yang terutama

²⁸ Seorang ahli Taurat datang mendengar mereka bersoal jawab. Dia menyadari bahawa Yesus telah menjawab dengan baik. Dia pun bertanya kepada-Nya,

“Perintah manakah yang terutama?”



²⁹ Yesus menjawab,

“Yang terutama antara semua perintah ialah: ‘Dengarlah, wahai umat Israel, Tuhan Allah kita, Tuhan itu esa. ³⁰ Kasihilah Tuhan, Allahmu, dengan sepenuh hatimu, dengan sepenuh jiwamu, dengan sepenuh fikiranmu, dan dengan sepenuh kekuatanmu.’ Inilah perintah yang terutama. ³¹ Perintah yang kedua ialah: ‘Kasihilah sesama manusia seperti kamu mengasihi dirimu sendiri.’ Tiada perintah lain yang lebih utama daripada dua perintah ini.”

³² Ahli Taurat itu berkata kepada Yesus,



“Sungguh baik jawapan Guru. Kata-kata Engkau itu benar, kerana Allah itu esa, tiada yang lain daripada-Nya. ³ Mengasihi-Nya dengan sepenuh hati, dengan sepenuh fikiran, dengan sepenuh jiwa, dan dengan sepenuh kekuatan, serta mengasihi sesama manusia seperti diri sendiri, adalah lebih utama daripada segala korban persembahan dan korban bakaran.”

³⁴ Yesus menyadari bahawa jawapan itu bijaksana, lalu berkata kepadanya,

“Kamu tidak jauh daripada kerajaan Allah.”

Selepas itu, tiada siapa yang berani menyoal-Nya apa-apa lagi.

Hubungan antara Yesus dengan Daud

³⁵Kemudian, ketika mengajar di Bait Suci, Yesus berkata,



“Bagaimanakah ahli-ahli Taurat dapat mengatakan bahawa Kristus itu anak Daud? ³⁶Kerana Daud sendiri berkata dengan panduan Roh Kudus:

“Tuhan berfirman kepada Tuanku:
Duduklah di kanan-Ku sehingga Kujadikan
segala musuh-Mu alas kaki-Mu.”

(Mazmur 110:1)

³⁷“Jadi, Daud sendiri memanggil-Nya ‘Tuan.’ Bagaimana mungkin Dia anaknya?”

Orang ramai mendengar kata-kata Yesus dengan sukacita.

³⁸Dia mengajar mereka lagi,

“Awas ahli-ahli Taurat, yang suka ke sana sini berjubah labuh, suka diberi salam hormat di pasar, ³⁹suka duduk di kerusi khas di rumah ibadat dan tempat terhormat di majlis jamuan. ⁴⁰Mereka merampas rumah balu tetapi kemudian pura-pura berdoa berjela-jela. Mereka ini akan menerima hukuman yang lebih berat.”


Persembahan seorang balu

⁴¹ Yesus duduk berhadapan dengan peti wang persembahan dan melihat betapa orang memasukkan wang ke dalamnya.



Ramai orang kaya memasukkan sumbangan yang besar. ⁴² Kemudian seorang balu yang miskin memasukkan dua keping wang tembaga,ⁿ yang sangat kecil nilainya.

Yesus memanggil murid-murid-Nya lalu berkata kepada mereka,



“Sesungguhnya, Aku berkata kepadamu, balu yang miskin itu telah memberi lebih daripada semua orang yang telah memasukkan wang ke dalam peti persembahan; ⁴⁴ kerana mereka memberi daripada kekayaan mereka yang melimpah, tetapi dia daripada kemiskinannya telah memasukkan semua yang ada padanya, seluruh rezekinya.”

12:42 Wang tembaga: Dua peser, iaitu satu duit—mata wang yang paling rendah nilainya (Yunani: *lepton*). Ini bererti balu itu memberikan segala yang dia miliki. Peti persembahan biasanya terletak di ruang khusus untuk perempuan di Bait Allah.

Bab 13


Tanda-tanda akhir zaman[†]

¹ Ketika Yesus sedang melangkah keluar dari Bait Suci, seorang murid-Nya berkata,

“Guru, lihatlah batu dan bangunan yang luar biasa di sini!”

² Yesus menjawab,

“Adakah kamu melihat bangunan yang hebat-hebat ini? Tiada seketul pun batunya akan tinggal tersusun; semuanya akan dirobohkan.”



³ Ketika Dia duduk di atas Bukit Zaitun setentang dengan Bait Suci, murid-Nya Petrus, Yakobus, Yohanes dan Andreas bertanya kepada-Nya secara peribadi,


⁴ “Katakanlah kepada kami, bilakah hal-hal itu akan terjadi? Apakah tanda-tandanya semua ini akan terjadi seperti yang telah dikatakan?”

[†] Akhir Zaman

Akhir zaman menjelang kedatangan Yesus yang kedua kali ditandai dengan pelbagai kekacauan, penderitaan dan kebinasaan. Tetapi Yesus berkata, “di dalam dunia ini kamu akan menghadapi penderitaan; tetapi teguhkanlah hatimu, kerana Aku telah menewaskan dunia” (Yohanes 16:33). Bagi orang Kristian, kita harus jangan mudah keliru atau goyah, jangan diperdayakan dengan pelbagai nubuatan, tipu helah durjana yang menyesatkan orang (2 Tesalonika 2), tetapi kita harus tetap teguh dalam iman kita, kerana Yesus pasti akan datang lagi!

Pautan Iman






⁵ Yesus mula berkata kepada mereka,

“Awat, jangan terperdaya oleh sesiapa pun! ⁶ Ramai akan datang dengan nama-Ku dan berkata, ‘Akulah Dia.’ Mereka akan membuat ramai orang terperdaya.



⁷ Apabila kamu mendengar peperangan dan desas-desus peperangan, jangan gentar; kerana hal-hal begitu harus terjadi, tetapi belum sampai waktunya

akhir zaman. ⁸ Bangsa akan bangkit bertarung dengan bangsa, kerajaan dengan kerajaan. Gempa bumi akan berlaku di merata-rata, dan juga kebuluran. Segala ini cuma permulaan kesakitan sebelum bersalin.




⁹ Berhati-hatilah tentang dirimu, kerana mereka akan mengheretmu ke hadapan majlis dan memukulmu di dalam rumah ibadat. Kamu akan dibawa kepada pemerintah dan raja kerana-Ku, untuk memberikan kesaksian kepada mereka.

¹⁰ Injil mesti disebarakan terlebih dahulu kepada semua bangsa. ¹¹ Apabila



mereka menangkapmu dan menyerahkankanmu kepada pihak berkuasa, janganlah khuatir apa yang akan kamu katakan. Tetapi apa yang diberitahu kepadamu pada waktu itu, tuturkanlah, kerana yang bertutur itu Roh Kudus, bukanlah kamu.


¹² Saudara akan berlaku khianat terhadap saudara, bapa terhadap anak, dan anak terhadap ibu bapa, lalu menyerahkan mereka untuk dibunuh. ¹³ Kamu akan dibenci oleh semua orang kerana nama-Ku. Tetapi sesiapa yang bertahan hingga ke akhir akan diselamatkan.”




¹⁴“Apabila kamu melihat ‘kekejadian yang membawa kebinasaan’ berdiri di tempat terlarang baginya (hendaklah para pembaca memperhatikan ertinya) orang yang ada di Yudea mesti lari ke pergunungan. ¹⁵Orang yang di atas bumbung ketika itu janganlah turun atau masuk ke rumah untuk mengambil apa-apa. ¹⁶Yang di ladang usahlah pulang mengambil pakaian. ¹⁷Malanglah ibu yang mengandung dan

yang menyusui anak pada masa itu! ¹⁸Berdoalah semoga hal-hal itu tidak terjadi pada musim dingin. ¹⁹Pada masa itu akan berlaku kesengsaraan yang belum pernah berlaku sejak dunia dicipta Allah hingga waktu itu dan tidak akan pernah berlaku lagi. ²⁰Kalaulah Tuhan tidak menyingkatkan masa itu, tiada seorang pun akan selamat. Namun demikian, demi umat pilihan yang dipilih-Nya, masa itu disingkatkan-Nya.”

²¹“Pada waktu itu, jika orang berkata kepadamu, ‘Lihat, Kristus ada di sini!’ atau ‘Lihat, Dia ada di sana!’ janganlah percaya; ²²kerana beberapa kristus palsu dan nabi palsu akan muncul dan menunjukkan pelbagai tanda serta keajaiban untuk memperdaya orang,




kalau boleh termasuk umat pilihan. ²³Berhati-hatilah. Lihat, Aku telah memberitahumu semua ini sebelum terjadi. ²⁴Pada masa itu, selepas



kesengsaraan, ‘Matahari akan dikelamkan, dan bulan tidak akan bersinar lagi; ²⁵bintang-bintang di langit akan gugur, dan kuasa-kuasa di langit akan digoncang.’

²⁶Kemudian mereka akan melihat Anak Manusia datang dalam awan penuh dengan kekuasaan dan kemuliaan yang besar.”



²⁷“Setelah itu, Dia akan menghantar para malaikat-Nya dan menghimpunkan umat pilihan-Nya dari empat mata angin, dari hujung bumi ke hujung langit.”



²⁸“Sekarang, kajilah ibarat daripada pokok ara: Apabila dahan-dahannya sudah melembut dan mula bertunas, kamu tahu musim panas hampir tiba. ²⁹Begitulah juga kamu. Apabila kamu melihat perkara-perkara ini, ketahuilah kamu bahawa waktunya hampir tiba, sudah di ambang pintu!

³⁰Sesungguhnya, Aku berkata kepadamu, angkatan zaman ini tidak akan luput sebelum segalanya ini terjadi. ³¹Langit dan bumi akan lenyap, tetapi kata-kata-Ku tidak akan lenyap.”

Hari dan masa tidak diketahui

³²“Tetapi tentang hari atau waktunya tiada siapa yang tahu baik para malaikat di syurga mahupun Anak. Hanya Bapa yang tahu. ³³Berhati-hatilah! Berjaga dan berdoa! Kerana kamu tidak tahu bila saatnya. ³⁴Umpama seorang yang berpergian: Dia meninggalkan rumahnya dan memberikan kekuasaan kepada hamba-hambanya, setiap



orang dengan tugasnya serta memerintahkan penjaga pintu supaya berjaga-jaga. ³⁵Oleh itu, berjaga-jagalah, kerana kamu tidak tahu bila tuan rumah akan pulang – pada waktu petang, atau tengah malam, ketika ayam berkokok, atau pada waktu pagi – ³⁶takut kalau-kalau dia datang tiba-tiba dan mendapatimu sedang tidur.

³⁷Apa yang Kukatakan kepadamu, Kukatakan kepada semua: ‘Berjagalah!’”

Bab 14

Yesus diurapi

¹ Dua hari lagi akan tibalah Perayaan Paskah dan Jamuan Roti Tidak Beragi, ketua-ketua imam dan ahli-ahli Taurat mencari jalan untuk memerangkap Yesus secara tipu daya dan membunuh-Nya. ² Tetapi mereka berkata,

“Janganlah pada waktu perayaan, takut orang merusuh.”



³ Ketika itu Yesus berada di Betania di rumah Simon yang menghidap penyakit kusta. Sedang Yesus duduk bertelekan di meja, seorang wanita datang membawa kendi pualam berisi minyak narwastu murni¹ yang amat mahal.



Dia memecahkan bejana itu lalu menuangkan minyak itu ke atas kepala Yesus.

14:3 Minyak narwastu murni: Narwastu adalah sejenis tanaman yang digunakan untuk membuat minyak wangi. Pada zaman dahulu, minyak wangi disimpan dalam kendi pualam yang ditutup, yang hanya dapat dibuka dengan memecahkan lehernya. Minyak wangi ini



⁴Beberapa orang berkata-kata sesama sendiri dengan marah,

“Mengapa dibazirkan minyak wangi ini? ⁵Minyak itu dapat dijual dengan harga lebih tiga ratus keping wang dinar dan wangnya disedekahkan kepada orang miskin.”

Mereka memarahi wanita itu. ⁶Tetapi Yesus berkata,

“Biarkan dia begitu. Mengapakah kamu menyusahkannya? Dia telah melakukan sesuatu yang baik untuk-Ku. ⁷Orang miskin akan sentiasa ada di sekitarmu, dan bila-bila sahaja kamu mahu, kamu dapat berbuat kebajikan kepada mereka. Tetapi Aku tidaklah sentiasa bersamamu.



⁸Dia telah melakukan apa yang terdaya olehnya. Dia menuangkan minyak wangi ke atas tubuh-Ku sebagai persiapan bagi pengebumian-Ku.

⁹Sesungguhnya, Aku berkata kepadamu, di mana-mana pun kelak Injil disebar di serata dunia, apa yang telah dilakukan oleh wanita ini akan dikisahkan juga sebagai kenangan kepadanya.”



¹⁰Selepas itu Yudas Iskariot, seorang daripada murid Yesus yang dua belas itu, pergi kepada ketua-ketua imam untuk mengkhianati-Nya dan menyerahkan-Nya kepada mereka. ¹¹Ketika mendengar kata-katanya mereka pun sukacita dan berjanji akan memberinya wang. Sejak itu Yudas mencari peluang untuk mengkhianati Yesus.

Perjamuan Tuhan



¹² Pada hari pertama Perayaan Roti Tidak Beragi, ketika mereka menyembelih anak domba Paskah, para murid Yesus berkata kepada-Nya,

“Di manakah Engkau mahu kami pergi menyediakan jamuan Paskah untuk-Mu?”

¹³ Dia menghantar dua orang murid-Nya dan berkata kepada mereka,

“Pergilah ke dalam kota. Seorang lelaki yang membawa sekendi air akan menemui kamu. Ikutlah dia.
¹⁴ Di mana dia masuk, katakan kepada tuan rumah, ‘Guru berkata: Di manakah ruang tamu untuk Aku makan jamuan Paskah dengan murid-murid-Ku?’



¹⁵ Dia akan menunjukkan kepadamu sebuah ruang besar di tingkat atas, lengkap dengan perabot dan telah siap disediakan. Di situlah kamu membuat persiapan untuk kita.”



¹⁶ Kedua-dua murid-Nya itu berangkat pergi ke kota, dan mendapati semua seperti yang telah dikatakan Yesus kepada mereka. Lalu mereka menyediakan jamuan Paskah.



¹⁷ Pada waktu lewat petang, Dia datang bersama murid-murid-Nya yang dua belas itu. ¹⁸ Sedang mereka duduk menikmati jamuan, Yesus berkata,

“Sesungguhnya, Aku berkata kepadamu, seorang daripada kamu yang makan bersama-Ku akan mengkhianati-Ku.”

¹⁹ Mereka mula berdukacita. Seorang demi seorang berkata kepada-Nya,

“Akukah orang itu?”

²⁰ Yesus menjawab,



“Dia seorang daripada dua belas yang mencecah roti bersama ke dalam bekas. ²¹ Anak Manusia memanglah harus pergi, seperti yang tersurat tentang-Nya. Tetapi malanglah orang yang mengkhianati Anak Manusia! Lebih baik baginya jika dia tidak dilahirkan.”


²² Ketika mereka sedang makan, Yesus mengambil roti, mengucap syukur lalu memecah-mecahkan dan memberikannya kepada murid-murid-Nya sambil berkata,



“Ambillah, ini tubuh-Ku.”



²³ Kemudian Dia mengambil cawan air anggur, dan selepas mengucap syukur, Dia memberikannya kepada mereka, lalu mereka semua minum dari cawan itu. ²⁴ Dia berkata kepada mereka,



“Ini darah perjanjian-Ku yang ditumpahkan untuk ramai orang. ²⁵ Sesungguhnya, Aku berkata kepadamu, Aku tidak akan minum air anggur lagi hinggalah pada hari Aku minum yang baru dalam kerajaan Allah.”

²⁶ Setelah menyanyikan sebuah lagu suci, mereka pun beredar ke Bukit Zaitun.

Petrus akan menyangkal Yesus

27 Lalu Yesus berkata kepada mereka,

“Malam ini, kamu semua akan goyah kerana-Ku, seperti yang telah tersurat:

‘Aku akan merebahkan Gembala, dan kawanannya akan bertempiaran.’ (Zakharia 13:7)

28 Tetapi setelah Aku dibangkitkan semula, Aku akan mendahului kamu ke Galilea.”



29 Petrus berkata kepada-Nya,

“Kalaupun semua yang lain goyah, aku tidak akan goyah.”

30 Yesus berkata kepadanya,

“Sesungguhnya, Aku berkata kepadamu, pada malam ini sebelum ayam berkokok dua kali, kamu akan menyangkal-Ku tiga kali.”

31 Tetapi Petrus berkata dengan lebih tegas lagi,

“Kalaupun aku terpaksa mati bersama-Mu, aku tidak akan menyangkal-Mu.”*

Semua yang lain pun berkata demikian.

***Menyangkal Yesus**

Pegangan Hidup



Menyangkal bererti tidak mengakui, tidak membenarkan, ingkar, tidak menepati apa yang sudah dijanjikan atau dikatakan. Adakah dalam kehidupan Kristian kita, kita juga tergoda untuk menyangkal Yesus? Adakah kita tergoda untuk tidak mahu atau berani mengaku sebagai murid Yesus apabila ada orang yang suka mentertawa dan mengganggu kita, hanya kerana kita adalah seorang murid Kristus?

Penyangkalan yang paling serius adalah penyangkalan dalam hati, kerana apa yang tersembunyi dalam diri seseorang itulah yang menunjukkan siapakah dia sebenarnya. Tuhan melihat hati kita, bukan mendengar apa yang diucapkan oleh lidah kita.

Yesus di Getsemani



³² Mereka sampai di suatu tempat yang dinamakan Getsemani. Yesus berkata kepada murid-murid-Nya,

“Duduklah di sini sementara Aku berdoa.”

³³ Dia membawa Petrus, Yakobus dan Yohanes bersama-Nya, dan Dia mula berasa gundah dan resah.

³⁴ Dia berkata kepada mereka,

“Jiwa-Ku sungguh dukacita, bagaikan mati. Duduklah di sini, dan berjagalah.”

³⁵ Dia pergi jauh sedikit lagi, lalu merebahkan diri ke tanah, dan berdoa kalau dapat, saat itu diedarkan daripada-Nya. ³⁶ Kata-Nya,

“Abba, Bapa, segala-galanya dapat Kaulakukan. Edarkanlah cawan ini daripada-Ku. Namun demikian, bukanlah kehendak-Ku tetapi kehendak-Mu yang terlaksana.”



³⁷ Kemudian Dia kembali kepada murid-murid-Nya dan mendapati mereka tertidur, lalu Dia berkata kepada Petrus,

“Simon, kamu tidurkah? Satu jam pun kamu tidak dapat berjaga? ³⁸ Berjaga dan berdoalah, takut nanti kamu tergoda. Memang rohani rela, tetapi jasmani lemah.”



³⁹ Dia pergi berdoa lagi, dengan kata-kata yang sama.



⁴⁰ Apabila Dia kembali, didapati-Nya mereka telah tertidur lagi, kerana mata mereka amat mengantuk. Mereka tidak tahu apa yang hendak dijawab kepada-Nya. ⁴¹ Setelah Dia datang kepada mereka bagi kali ketiga, Dia berkata,



“Adakah kamu masih tidur dan berehat? Cukuplah! Waktunya sudah tiba. Lihat, Anak Manusia sedang dikhianati dan diserahkan ke tangan orang berdosa. ⁴² Bangunlah! Mari kita pergi! Lihat, pengkhianat-Ku sudah tiba!”

Yesus ditangkap



⁴³ Sesaat kemudian, ketika Dia masih berkata-kata, seorang daripada murid-Nya yang dua belas itu, iaitu Yudas datang dengan orang yang sangat ramai dan bersenjatakan pedang serta belantan. Mereka datang daripada ketua-ketua imam, ahli-ahli Taurat dan tua-tua.

⁴⁴ Pengkhianat Yesus telah menetapkan satu isyarat dengan mereka:

“Yang kucium nanti, itulah Dia. Tangkap Dia dan bawalah Dia pergi dengan selamat.”



⁴⁵ Sebaik-baik Yudas tiba, dia pergi kepada Yesus sambil berkata, “Rabbi!” lalu mencium-Nya.

⁴⁶ Mereka pun menangkap Yesus dan membawa-Nya pergi.



⁴⁷ Seorang daripada yang berdiri di situ menghunus pedangnya lalu menetak hamba imam besar, sehingga terputus telinganya. ⁴⁸ Yesus berkata kepada mereka,



“Patutkah kamu datang bagaikan hendak menangkap perompak, dengan pedang dan belantan, untuk

membawa-Ku pergi? ⁴⁹ Setiap hari Aku dalam kalanganmu, mengajar di Bait Suci, dan kamu tidak menangkap-Ku. Tetapi yang tersurat dalam Kitab Suci mestilah terlaksana.”

⁵⁰ Setelah itu, semua murid Yesus meninggalkan-Nya dan masing-masing melarikan diri.



⁵¹ Seorang pemuda mengikut-Nya, dengan hanya sehelai kain linen membalut tubuhnya. Pemuda-pemuda lain menangkapnya, ⁵² lalu dia melucutkan kain linen itu dan melarikan diri daripada mereka dalam keadaan telanjang.

Yesus di hadapan Majlis Agama

⁵³ Yesus dibawa kepada imam besar. Bersamanya berhimpun semua ketua imam, tua-tua, dan ahli-ahli Taurat.

⁵⁴ Petrus mengikut Yesus dari jauh, turut masuk ke laman dalam rumah imam besar, dan duduk dalam kalangan hamba, berdiang di situ.





⁵⁵ Ketua-ketua imam dan seluruh Majelis Agama berusaha mencari kesaksian terhadap Yesus supaya dapat membunuh-Nya, tetapi mereka tidak berjaya. ⁵⁶ Ramai yang memberi kesaksian palsu terhadap-Nya, tetapi kesaksian mereka semua bercangghah.

⁵⁷ Kemudian beberapa orang bangkit memberi kesaksian palsu terhadap-Nya dengan berkata,

⁵⁸ “Kami telah mendengar Dia berkata, ‘Aku akan membinasakan Bait Suci yang diperbuat dengan tangan ini, dan dalam tiga hari Aku akan membina Bait Suci yang diperbuat tanpa tangan.’”



⁵⁹ Tetapi kesaksian mereka masih bercangghah.



⁶⁰ Imam besar bangkit berdiri di tengah-tengah kesaksian itu lalu bertanya kepada Yesus,

“Tidakkah Kamu mahu menjawab apa-apa? Apakah yang didakwakan oleh mereka ini terhadap-Mu?”

⁶¹ Tetapi Yesus berdiam diri, tidak menjawab sepatah pun. Imam besar itu bertanya lagi kepada-Nya,

“Adakah Kamu Kristus, Anak Allah Yang Termulia?”




⁶² Yesus menjawab,

“Ya, Akulah Dia. † Kamu akan melihat Anak Manusia duduk di sebelah kanan Yang Maha Kuasa, dan datang dalam awan di langit.”

⁶³ Imam besar itu lalu mengoyak-ngoyakkan pakaiannya sambil berkata,

“Adakah kita perlukan saksi lagi? ⁶⁴Kamu telah mendengar kata-kata kufur-Nya sendiri! Apakah pendapatmu?”



Lalu mereka semua menjatuhkan hukum ke atas-Nya, bahawa Dia patut dibunuh. ⁶⁵Kemudian sesetengah mereka mulai meludahi-Nya, membalut mata-Nya lalu memukul-Nya dan berkata kepada-Nya, “Bernubuatlah!”
Pegawal-pegawal pula menampar-Nya.

† Akulah Dia

Ucapan ini mempunyai pengertian ilahi, kerana ungkapan “Akulah” digunakan Perjanjian Lama sebagai pengakuan Allah ketika Dia menyatakan diri-Nya kepada Musa, “AKULAH AKU” (Keluaran 3:14).

Apabila Yesus berkata “Akulah Dia”, itu sama saja dengan mengatakan “Akulah Allah”, kerana Dia memakai salah satu ungkapan ilahi yang paling suci dalam Perjanjian Lama untuk diri-Nya. Dia dengan tegas menyatakan diri-Nya sebagai Mesias.

Dia menyatakan diri-Nya duduk di “sebelah kanan” Allah Yang Maha Kuasa, yang menyiratkan bahawa Dia mempunyai kewenangan dan kekuasaan Allah. Dia mengisyratkan “kedatangan-Nya dalam awan” dengan menegaskan diri-Nya sebagai Hakim umat manusia pada masa akan datang.

Pautan Iman



Petrus menyangkal Yesus

⁶⁶ Petrus ada di bawah, di laman dalam. Seorang hamba perempuan imam besar datang ke situ.

⁶⁷ Apabila dia melihat Petrus sedang berdiang memanasakan tubuhnya, dia memandang Petrus dan berkata,

“Kamu juga bersama Yesus orang Nazaret.”

⁶⁸ Petrus menyangkal, katanya,

“Aku tidak tahu dan tidak faham apa yang kaukatakan.”

Dia keluar ke serambi depan, lalu ayam berkokok.



⁶⁹ Hamba perempuan itu melihatnya lagi, lalu mula berkata kepada orang yang berdiri di situ,

“Ini seorang daripada mereka.”

⁷⁰ Petrus menyangkalnya lagi.

Sejurus kemudian, mereka yang berdiri di situ berkata pula kepada Petrus,

“Sudah tentu kamu seorang daripada mereka, kerana kamu orang Galilea.”

⁷¹ Petrus pun mengucapkan kutuk dan sumpah,

“Aku tidak kenal orang yang kaukatakan itu!”



⁷² Ayam pun berkokok bagi kali kedua. Lalu Petrus teringat kata-kata Yesus kepadanya:

“Sebelum ayam berkokok dua kali, kamu akan menyangkal-Ku tiga kali.”


Memikirkan perkara itu, Petrus menangis dengan kesalnya.



Bab 15

Yesus di hadapan Pilatus

¹Awal-awal pagi lagi ketua-ketua imam segera bermesyuarat dengan para tua-tua, ahli Taurat dan seluruh Majlis Agama. Kemudian mereka mengikat Yesus, membawa-Nya pergi dan menyerahkan-Nya kepada Pilatus.



²Pilatus bertanya kepada-Nya,

“Adakah Engkau Raja orang Yahudi?”

Yesus menjawab,


“Begitulah seperti katamu.”

³Kemudian ketua-ketua imam melemparkan pelbagai tuduhan terhadap-Nya.


⁴Pilatus bertanya lagi kepada-Nya,

“Tidakkah Engkau mahu menjawab apa-apa? Lihat betapa banyaknya tuduhan mereka terhadap-Mu?”

⁵Tetapi Yesus masih tidak menjawab sepeatah pun, sehingga Pilatus kehairanan.




⁶Pada waktu perayaan, lazimnya Pilatus membebaskan dari penjara seorang yang diminta oleh mereka. ⁷Ada seorang bernama Barabas yang dirantaikan bersama beberapa orang pemberontak lain. Mereka telah melakukan pembunuhan dalam pemberontakan itu.



⁸Orang ramai mula berseru lantang meminta Pilatus membebaskan seorang dari penjara seperti yang biasa dilakukannya.

⁹Pilatus bertanya,

“Adakah kamu mahu aku membebaskan kepadamu Raja orang Yahudi?”



¹⁰kerana dia tahu bahawa ketua-ketua imam telah menyerahkan Yesus kepadanya kerana iri hati.

¹¹Tetapi ketua-ketua imam menghasut orang ramai supaya meminta Barabas dibebaskan kepada mereka.

¹²Pilatus berkata kepada mereka,


“Kalau begitu, apa yang kamu mahu kulakukan kepada Dia yang kamu panggil Raja orang Yahudi?”

¹³Mereka berseru lagi dengan kuatnya, “Salibkan Dia!”

¹⁴Kata Pilatus kepada mereka,

“Mengapa? Apakah kejahatan yang telah dilakukan-Nya?”

Tetapi mereka semakin kuat berseru, “Salibkan Dia!”



¹⁵Oleh itu, untuk memuaskan hati orang ramai itu, Pilatus membebaskan Barabas kepada mereka. Setelah menyebat Yesus, dia menyerahkan-Nya untuk disalib.



Yesus dipermainkan



¹⁶ Kemudian para askar membawa-Nya ke dewan istana yang dipanggil Praetorium, lalu menghimpunkan seluruh pasukan tentera yang ada di situ. ¹⁷ Mereka mengenakan jubah ungu pada tubuh-Nya, dan membuat mahkota daripada duri lalu meletakkannya di atas kepala-Nya.




¹⁸ Kemudian mereka menyindir-Nya, “Daulat Tuanku, Raja orang Yahudi!”


¹⁹ Mereka memukul kepala-Nya dengan mentsiang, meludahi-Nya, kemudian tunduk menyembah-Nya. ²⁰ Setelah mempermain-mainkan-Nya, mereka melucutkan jubah ungu itu dan mengenakan semula pakaian-Nya. Lalu mereka membawa-Nya untuk disalib.



Yesus disalib



²¹ Ketika itu seorang yang bernama Simon, orang Kirene, bapa kepada Aleksander dan Rufus sedang lalu di situ. Dia baru sahaja datang dari luar bandar. Kemudian mereka memaksanya mengangkat salib Yesus. ²² Mereka membawa-Nya ke tempat yang dipanggil Golgota (bermaksud Tempat Tengkorak).



²³ Kemudian mereka memberi-Nya air anggur bercampur mir tetapi Dia enggan meminumnya.

²⁴ Setelah mereka menyalib-Nya, mereka membahagikan pakaian-Nya antara mereka dengan membuang undi.

²⁵ Mereka menyalib-Nya pada jam ketiga (pukul sembilan pagi).

²⁶ Tuduhan terhadap-Nya tertulis di atas: Raja orang Yahudi.





²⁷Mereka menyelib dua orang perompak bersama Yesus, seorang di kanan dan seorang di kiri-Nya. ²⁸Dengan demikian terlaksanalah apa yang tersurat dalam Kitab Suci:

“Dan Dia digolongkan dengan penjahat.” (Yesaya 53:12)



²⁹Semua orang yang lalu di situ menggeleng-gelengkan kepala sambil mengejek Yesus. Mereka berkata,

“Kamu mahu memusnahkan Bait Suci dan membinanya semula dalam tiga hari! ³⁰Sekarang turunlah dari salib itu dan selamatkanlah diri-Mu!”

³¹Begitu jugalah ketua-ketua imam dan ahli Taurat turut memperolok-olokkan Yesus. Mereka berkata sesama sendiri,

“Dia menyelamatkan orang, tetapi tidak dapat menyelamatkan diri-Nya sendiri! ³²Kiranya Kristus ini, Raja Israel, turunlah dari salib, supaya kami melihat dan percaya kepada-Nya!”



Orang yang disalib bersama Yesus pun mencela-Nya. Dia berkata,

“Bukankah Engkau Kristus? Selamatkanlah diri-Mu dan kami!”ⁿ

Kematian Yesus †



33 Pada jam keenam hingga jam kesembilan (tengah hari hingga pukul tiga petang), seluruh negeri itu diselubungi kegelapan.
34 Pada jam kesembilan (pukul tiga petang), Yesus berseru dengan suara yang lantang,



Eloi, Eloi, lama sabakhtani?
(Ya Allah-Ku, ya Allah-Ku, mengapa Kau tinggalkan Aku?)

35 Beberapa orang di situ mendengar seruan itu dan berkata,

“Dengarlah, Dia memanggil Elia.”



36 Seorang daripada mereka berlari mengambil span lalu mencelupnya ke dalam air anggur masam. Kemudian dia mencucukkan span itu di hujung sebatang mensiang dan menawarkannya kepada Yesus untuk minum, sambil berkata,




“Kita menunggu, kalau-kalau Elia datang menurunkan-Nya dari salib.”



37 Yesus berseru dengan kuat lalu menghembuskan nafas terakhir. †






³⁸ Sejurus kemudian, tirai di dalam Bait Suci terbelah dua, dari atas hingga ke bawah.

³⁹ Ketua tentera yang berdiri di hadapan salib itu melihat semua ini lalu berkata, “Benarlah Dia Anak Allah!”



⁴⁰ Beberapa orang wanita menyaksikan segala-galanya dari jauh. Antara mereka ialah Maria Magdalena, serta Maria ibu Yakobus Muda dan Yoses, serta Salome. ⁴¹ Mereka wanita yang mengikut dan menolong Yesus ketika Dia di Galilea. Ada ramai juga wanita yang datang dengan Yesus ke Yerusalem.



Yesus dimakamkan


⁴²Hari sudah lewat petang. Hari itu Hari Persediaan, iaitu sehari sebelum hari Sabat. ⁴³Yusuf dari Arimatea, seorang ahli terkemuka Majlis Agama yang sedang menunggu kerajaan Allah, datang lalu memberanikan hatinya menghadap Pilatus dan memohon untuk mengambil jenazah Yesus.



⁴⁴Pilatus hairan mendengar Yesus sudah pun meninggal dunia, lalu memanggil ketua tentera dan bertanya sama ada Yesus sudah meninggal. ⁴⁵Setelah mendengar laporan ketua tentera itu, dia pun menyerahkan jenazah Yesus kepada Yusuf. ⁴⁶Yusuf membeli kain linen yang baik, menurunkan jenazah Yesus dan mengafkannya dengan kain itu. Dia membaringkan jenazah itu di dalam sebuah makam yang telah digali di permukaan batu pejal, lalu menggulingkan sebuah batu besar menutup pintu makam itu.



⁴⁷Maria Magdalena dan Maria ibu Yoses memerhatikan tempat makam itu.



Bab 16

Kebangkitan Yesus[✠]



¹ Setelah tamat hari Sabat, Maria Magdalena, Maria ibu Yakobus, dan Salome membeli ramuan rempah untuk melumuri jenazah Yesus. ² Pada awal pagi hari pertama minggu itu, mereka sampai di makam itu ketika matahari terbit. ³ Mereka berkata-kata sesama sendiri,

“Siapa yang akan menggulingkan batu daripada pintu makam untuk kita?”



⁴ Apabila mereka memandang makam itu, mereka mendapati batu yang sangat besar itu telah pun digulingkan. ⁵ Mereka masuk ke dalam makam itu dan melihat seorang pemuda berjubah putih sedang duduk di sebelah kanan; mereka sungguh terkejut dan ketakutan. ⁶ Tetapi dia berkata kepada mereka,

“Jangan takut. Kamu mencari Yesus orang Nazaret, yang telah disalib. Dia telah bangkit semula! Dia tidak ada di sini. Lihatlah tempat mereka



baringkan jenazah-Nya. ⁷ Tetapi, pergilah, beritahu murid-murid-Nya, termasuk Petrus, bahawa Dia mendahuluiimu ke Galilea. Di sana kamu akan melihat-Nya, seperti yang telah dikatakan-Nya kepada kamu.”

⁸ Mereka pun segera keluar dan berlari meninggalkan makam itu, kerana mereka gementar dan kehairanan. Mereka tidak berkata apa-apa kepada sesiapa, kerana mereka takut.



†Kebangkitan Yesus

Kelahiran, kematian dan kebangkitan Yesus adalah dasar iman kepercayaan orang Kristian. Dakwaan Yesus tidak mati disalib tetapi diangkat langsung ke syurga, jenazah-Nya dicuri, atau Yesus mati sama seperti manusia yang lain dan Dia tidak bangkit merupakan usaha-usaha penyangkalan keilahian Yesus. Bagi orang Kristian, makam Yesus yang kosong adalah suatu bukti bahawa Tuhan kita hidup.

Makam Yesus yang Kosong

Bukan mudah untuk mencuri jenazah Yesus! Batu seberat dua tan telah digunakan sebagai penutup makam untuk mengelakkan pencerobohan daripada pencuri makam. Batu itu dipasak dalam satu lurah condong dan apabila jenazah sudah dimasukkan ke dalam makam, pasak itu akan dialihkan dan batu akan terguling untuk menutup pintu. Pakar arkeologi mengatakan 20 tenaga orang lelaki diperlukan untuk menggulingkan batu tersebut! Tetapi penutup itu didapati telah terguling ketika pengikut Yesus datang ke makam (Markus 16).

Satu materai Roma (tali yang dililit di atas batu) diletak untuk menghalang pencuri masuk ke makam Yesus. Ada enam belas pengawal ditempatkan untuk mengawal makam. Mereka adalah pengawal tentera Roma yang terkenal dengan disiplin tinggi, yang akan dihukum bakar sampai mati jika didapati tertidur semasa mengawal! Jadi di manakah tubuh Yesus sekiranya Dia tidak dibangkitkan? Tidak ada tubuh yang dijumpai untuk dijadikan bukti selama lebih dari 2,000 tahun!


Untuk Peneguhan Iman Kita:

Kebangkitan Yesus membuktikan kepada kita bahawa Dia adalah Tuhan (Yohanes 10:18), kematian-Nya adalah sebagai penebusan bagi dosa kita telah diterima oleh Allah (Rom 4:24-25). Sekiranya Dia telah mati dan kekal dalam kematian, maka sia-sialah pengorbanan-Nya dan kepercayaan kita (1 Korintus 15:16-19).

Tetapi hakikatnya adalah: Kristus telah dibangkitkan daripada kematian. Kebangkitan-Nya adalah bukti kemenangan-Nya ke atas maut (1 Kor 15:24-34). Hakikat ini juga mengisytiharkan bahawa kerana kebangkitan Kristus, semua orang yang telah percaya kepada-Nya akan memperoleh kemenangan ke atas dosa (1 Kor 15: 50-58). Mereka tidak lagi dalam belenggu dosa tetapi telah dimerdekakan (Rom 6:11). Dan mereka boleh hidup dalam kemenangan, bahkan lebih dari pemenang (Rom 8:37)!

Yesus menampakkan diri kepada murid-Nya

⁹Setelah Yesus bangkit semula pada awal pagi hari pertama minggu itu, pertama sekali Dia menampakkan diri-Nya kepada Maria Magdalena yang telah disembuhkan-Nya daripada dirasuk tujuh roh iblis dahulu.





¹⁰Maria pun pergi memberitahu murid-murid-Nya yang sedang berkabung dan menangis. ¹¹Ketika mendengar bahawa Yesus hidup dan telah dilihat oleh Maria, mereka tidak percaya.

¹²Selepas itu, Dia menampakkan diri dengan cara lain kepada dua orang daripada mereka ketika mereka sedang berjalan ke desa.



¹³Kedua-dua orang murid Yesus itu segera pergi memberitahu yang lain, tetapi mereka juga tidak percaya.

¹⁴Kemudian Dia menampakkan diri kepada kesemua murid-Nya yang sebelas itu ketika mereka sedang makan. Dia menegur sikap mereka yang tidak percaya dan keras hati, kerana mereka tidak mempercayai orang yang telah melihat-Nya setelah Dia bangkit semula.




Dia berkata kepada mereka,



“Pergilah ke serata dunia dan sebarkan Injil kepada setiap insan.”





¹⁶“Sesiapa yang percaya dan dibaptiskan akan diselamatkan, tetapi sesiapa yang tidak percaya akan dihukum. ¹⁷Tanda-tanda ini akan menyertai mereka yang percaya: Dengan nama-Ku mereka akan menghalau roh-roh iblis, dan mereka akan bertutur dalam bahasa-bahasa baru. ¹⁸Mereka akan memegang ular tanpa mudarat. Kiranya mereka terminum racun, mereka tetap selamat. Mereka akan meletakkan tangan pada orang sakit dan orang itu akan sembuh.”



¹⁹ Setelah Tuhan Yesus berkata-kata dengan mereka, Dia disambut naik ke syurga lalu duduk di kanan Allah.


²⁰ Para murid-Nya pergi menyampaikan perkhabaran Injil di serata dunia. Tuhan bekerja bersama mereka, mengesahkan firman dengan iringan tanda-tanda ajaib.



Epilog



Selama empat puluh hari selepas kebangkitan-Nya daripada kematian, Yesus menampakkan diri-Nya dalam keadaan hidup kepada ramai orang. Mereka melihat-Nya dalam berbagai-bagai cara. Dia bercakap tentang perkara-perkara yang berkaitan dengan Kerajaan Allah.

“Segala kekuasaan telah diserahkan kepada-Ku, baik di syurga mahupun di bumi. Oleh itu pergilah, jadikan semua bangsa murid-Ku. Baptislah mereka dengan nama Bapa, Anak dan Roh Kudus.✠ Ajar mereka supaya taat akan segala perkara yang telah Kuperintahkan kepadamu. Aku akan sentiasa bersamamu, hingga ke akhir zaman.”




“Kamu akan menerima kuasa apabila Roh Kudus datang kepadamu; dan kamu akan menjadi saksi-Ku di Yerusalem, di seluruh Yudea dan Samaria, bahkan sampai ke hujung bumi.”

Mesej penyelamatan Allah melalui kematian dan kebangkitan Anak-Nya, Yesus Kristus, terus disampaikan dan disebarkan ke seluruh dunia, bermula dari hari kebangkitan-Nya, sehinggalah ke hari ini. Berita Baik salib Yesus dan makam-Nya yang kosong itu memberitahu kepada kita bahawa Yesus adalah Tuhan.





“Allah begitu mengasihi dunia sehingga menganugerahkan Anak-Nya yang tunggal supaya setiap orang yang percaya kepada-Nya tidak binasa melainkan mendapat hidup kekal. Allah mengutus Anak-Nya ke dunia bukan untuk menghakimi dunia tetapi supaya melalui Dia, dunia ini diselamatkan.” (*Yohanes 3:16-17*)



Pada hari ini, Yesus tetap memanggil dan mengajak anda dan saya untuk datang kepada-Nya. “Marilah ke sisi-Ku, wahai semua yang jernih lelah dan memikul beban berat; Aku akan memberimu kelegaan.” (*Matius 11:28*) Kita hanya perlu membuka hati kepada-Nya, percaya kepada-Nya, mengaku dan menyesali dosa-dosa kita, dan menjemput Dia masuk ke dalam hidup kita untuk menjadi Tuhan dan Raja kehidupan kita.

Adakah anda mendengar Dia sedang memanggilmu?

Jalan Penyelamatan



Ketika kita
masih berdosa,
Kristus telah
mati untuk kita
(Rom 5:8)

Tidak ada hukuman
bagi orang
yang ada dalam
Kristus Yesus
(Rom 8:1)



Kristus telah mati, dikuburkan selama 3 hari, dan bangkit.

Aku telah menyampaikan kepadamu hal-hal utama, yang telah kuterima sendiri: Bahwa Kristus telah mati untuk menebus dosa kita, sebagaimana tersurat dalam Kitab Suci; bahwa Dia telah dikuburkan, dan telah dibangkitkan pada hari ketiga, sebagaimana tersurat dalam Kitab Suci.

(1 Korintus 15:3-4)

Penyelamatan adalah satu kurnia dari Allah

Kamu telah diselamatkan dengan kasih kurnia-Nya melalui iman — ini bukan daripada kamu sendiri tetapi adalah kurnia Allah — bukan kerana usaha amalmu supaya tiada seorang pun yang dapat bermegah.

(Efesus 2:8-9)

Akuilah dosamu dan Dia akan mengampunkan

Sekiranya kita mengatakan bahawa kita tidak berdosa, kita menipu diri kita sendiri dan kebenaran tidak ada dalam diri kita. Tetapi jika kita mengakui dosa kita kepada Allah, Dia akan menepati janji-Nya dan berlaku adil. Dia akan mengampunkan dosa kita dan menyucikan kita daripada segala kesalahan.

(1 Yohanes 1:8-9)

Alkitab

Kisah Yesus dicatatkan dalam Alkitab. Tidak ada buku lain yang telah dibaca, masih dibaca, dan kerap dibaca selain daripada Alkitab. Ia adalah satu kitab dengan 66 buah kitab. Ia mengambil masa 1,500 tahun untuk menulis semua kitab itu. Alkitab selesai ditulis dan dikanonkan sekitar 1,900 tahun yang lalu. Ia mengandungi pelbagai jenis cerita tentang bagaimana Allah terlibat dalam kehidupan manusia. Kisah Yesus Kristus menunjukkan dengan jelas siapakah Allah dan Tuhan itu.


Sejarah Kehidupan Yesus

Alkitab mengandungi 4 buah kitab yang menggambarkan kehidupan Yesus. Mereka disebut Injil (yang bererti Berita Baik) dan dinamakan mengikut penulis mereka. Semua penulis Injil hidup pada zaman Yesus.

1. Matius – murid Yesus. Dia pernah bekerja sebagai seorang pemungut cukai. Dia menceritakan kisah Yesus sebagai Mesias, Raja orang Israel. Injil ini penuh dengan penggenapan nubuat-nubuat Perjanjian Lama.

2. Markus – dia masih remaja ketika Yesus melakukan pekerjaan-Nya. Dia menceritakan kisah Yesus sebagai hamba, dan menulis banyak tentang mukjizat-mukjizat yang dilakukan oleh Yesus.

3. Lukas – seorang doktor perubatan. Dia sendiri tidak pernah jumpa Yesus. Lukas menunjukkan Yesus sebagai Anak Manusia yang datang



untuk mencari dan menyelamatkan mereka yang terhilang.


4. Yohanes – pengikut Yesus. Dia menunjukkan Yesus sebagai Firman Allah yang menjelma menjadi manusia, dan menunjukkan siapakah Yesus – Dia adalah Kristus (Yang Diurapi) dan Tuhan, yang menjadi manusia untuk membebaskan manusia dari dosa-dosa mereka.

Kelahiran Yesus


Ibu Yesus, Maria, belum berkahwin ketika Yesus dilahirkan. Dia masih seorang anak dara. Namun Allah telah mengaturkan semuanya supaya Yesus dapat dilahirkan. Keajaiban ini telah dinyatakan dalam kitab-kitab yang ditulis jauh sebelum zaman Yesus. Yesus tidak dilahirkan sebagai seorang pahlawan atau dalam satu keadaan yang istimewa. Dia dilahirkan di dalam kandang haiwan, di sebuah palung kerana tidak ada tempat bagi Yusuf dan Maria di rumah tumpangan sewaktu tiba masa Maria melahirkan Yesus.

Mukjizat dan Keajaiban Yesus

Yesus melakukan banyak mukjizat. Alkitab menyebut lebih daripada 40 penyembuhan. Melalui mukjizat-mukjizat ini, Yesus memperlihatkan kuasa dan kasih Allah, dan Dia ingin membantu semua orang dan membuat mereka bahagia.



Kematian dan Kebangkitan Yesus



**Kenapa Yesus mati? Penjelasan
diberikan di dalam Alkitab.**

Semua manusia melakukan perkara-perkara yang salah. Perkara-perkara yang salah itu dipanggil dosa. Allah tidak menyenangi dosa dan itu membuat Dia murka atau sedih. Dosa memisahkan manusia daripada Allah, sehingga manusia tidak dapat bersekutu dengan Allah. Itulah sebabnya Yesus datang ke dunia. Dengan kehendak-Nya sendiri, Yesus menanggung dan mengambil hukuman atas dosa-dosa kita. Hukuman itu adalah kematian.

Oleh kerana Yesus telah mati untuk kita, kini kita boleh bersekutu dan kembali bersahabat dengan Allah. Tetapi kita perlu menyesali perbuatan salah kita. Itu dipanggil pertaubatan. Kita harus bertaubat dan berjanji untuk berpaling dari jalan dosa.

Yesus telah bangkit dari antara orang mati. Allah menjadikan Dia hidup semula. Dengan ini Allah menunjukkan bahawa Yesus lebih berkuasa daripada kematian. Dia telah bangkit dari maut.

Yesus kini hidup bersama Allah, dan duduk di sebelah kanan Allah. Kerana Dia hidup, Dia dapat sentiasa menjadi sahabat kita. Dia mahu membantu kita untuk hidup dengan cara yang membawa kesenangan kepada Allah.

Doa

Sekiranya anda berasa menyesal atas perkara-perkara yang salah yang telah anda lakukan, dan jika anda ingin menjadi sahabat dengan Allah, anda boleh berdoa seperti ini:

“Ya Bapa, Engkau mengasihi saya.

Engkau telah memberi Yesus, Anak-Mu yang tunggal.

Dia telah mati di atas salib untuk semua dosa yang telah saya lakukan.

Saya mengaku bahawa saya telah berdosa.

Ampunilah semua dosa dan kesalahan saya.

Terima kasih Yesus. Saya mahu sentiasa menjadi milik-Mu.

Bantulah saya untuk menjalani kehidupan yang Engkau perkenankan.

Saya memohon agar Engkau sentiasa dekat dengan saya.

Terima kasih kerana menjawab doa-doa saya.

Dalam nama Yesus saya berdoa. Amin.”



Lihatlah! Singa daripada suku Yehuda, Tunas Daud,
telah menang. Dengan darah kematian-Mu
Engkau telah menebus untuk Allah manusia
daripada segala suku, bahasa, kaum, dan bangsa.
Dia telah menjadikan mereka suatu kerajaan
dan imam-imam Allah untuk menyembah
Allah kita dan memerintah di bumi.
(Wahyu 5:5a, 9-10)

Kenaikan dan Kedatangan Yesus yang Kedua Kali

Empat puluh hari selepas kebangkitan Yesus daripada kematian, Dia diangkat ke Syurga, dan duduk di sebelah kanan Allah Bapa. Allah meletakkan semuanya di bawah kaki-Nya. Satu hari nanti, Dia akan datang kembali ke dunia ini—bukan sebagai seorang Hamba, tetapi sebagai Raja dan Hakim. Dia akan menghakimi semua yang hidup dan yang telah mati pada Hari Penghakiman (Kiamat) itu. Yang percaya kepada Yesus akan diangkat ke Syurga untuk tinggal bersama-Nya. Sementara yang ingkar dan menyangkal-Nya akan dihumban masuk ke dalam neraka.

Yesus dan Anda

Kisah Yesus mempunyai satu penghujung yang terbuka. Yesus menjadi Sahabat kepada ramai orang, dahulu dan sekarang. Dunia telah berubah. Kini manusia menggembara bukan hanya dengan menunggang keldai atau kuda lagi, tetapi mereka melakukan perjalanan dengan menaiki kereta dan kapal terbang. Tetapi ini tidak ada apa-apa perbezaan bagi Yesus. Dia boleh berjalan sangat rapat dengan kita sama seperti ketika Dia berjalan di Israel lebih dari 2,000 tahun yang lalu.

Dia mungkin tidak kelihatan, tetapi Dia tetap hadir dan nyata. Orang yang mengenali Dia akan dapat merasa kehadiran-Nya itu. Dia mahu menjadi Rakan anda pada hari ini. Anda boleh mendengar suara-Nya dan anda boleh mengasihi Dia.

Adakah anda ingin mengetahui lebih banyak tentang Yesus dan tentang kehidupan bersama Dia?

Anda boleh bermula dengan melakukan perkara-perkara berikut:

- 1. Mula membaca Alkitab** untuk diri sendiri (anda boleh mula dengan membaca Injil Lukas atau Yohanes).
- 2. Mula berdoa** (bercakap dengan Tuhan dan mendengarkan-Nya — anda tidak perlu menggunakan kata-kata istimewa. Cukup dengan berbicara sama seperti anda bercakap dengan sahabat anda).
- 3. Memberitahu orang lain tentang Yesus dan Alkitab.** Yesus mahu para pengikut-Nya bertemu dan saling menggalakkan satu sama lain apabila mereka belajar lebih banyak tentang Dia.

Anda adalah seorang murid Kristus, kerana setiap murid Kristian adalah murid Kristus!

Untuk mengetahui lebih lanjut tentang Yesus, Alkitab dan persekutuan dengan orang Kristian yang lain, hubungi komik.singa.yehuda@gmail.com atau alamat di bawah:

Sebuah Doa

Oleh itu aku juga, setelah mendengar bahawa
kamu beriman kepada Tuhan Yesus
dan mengasihi semua orang yang salih,
tidak putus-putus bersyukur tentangmu
dan menyebutmu dalam doaku.

Aku berdoa semoga Allah Tuhan kita Yesus Kristus,
iaitu Bapa kemuliaan,
memberimu roh kebijaksanaan dan wahyu untuk mengenali-Nya.

Semoga Allah menerangkan mata hatimu
untuk mengetahui harapan daripada panggilan-Nya,
limpah kemuliaan warisan-Nya dalam orang yang salih,
dan betapa besar kuasa-Nya bagi kita yang beriman.

Demikianlah pelaksanaan kuasa-Nya yang agung itu dalam Kristus
apabila membangkitkan-Nya daripada kematian
dan mendudukkan-Nya di sebelah kanan-Nya di syurga.
Allah meletakkan Kristus jauh di atas segala penguasa dan kekuasaan,
kuasa dan pemerintahan, dan setiap nama yang dinamakan,
bukan sahaja pada zaman ini tetapi juga pada zaman akan datang.
Allah meletakkan segalanya di bawah kaki-Nya
dan menjadikan-Nya Kepala semua hal ehwal jemaah,
yang merupakan tubuh-Nya,
disempurnakan oleh Dia yang menyempurnakan segala-galanya.
Amin.

(Efesus 1:15-23)

Singa Yehuda

Ini adalah kisah sebenar tentang Yesus Kristus. Dia hidup di Israel kira-kira 2,000 tahun lalu. Semua orang yang bertemu dengan-Nya berasa sangat kagum dan takjub. Tiada siapa yang pernah melakukan apa yang telah Dia lakukan. Tiada siapa yang pernah berkata perkara-perkara yang Dia katakan. Mukjizat dan keajaiban terus berlaku di mana saja Yesus berada. Dia membawa sukacita serta kebahagiaan kepada semua orang yang mahu mendengar-Nya. Tetapi tiba-tiba ia berakhir. Musuh-musuh-Nya telah membunuh-Nya. Namun itu bukanlah satu pengakhiran. Bacalah sendiri bagaimana perkara itu berlaku dan kelanjutan cerita Yesus Kristus, Penyelamat dunia!



**WAWASAN
PENABUR**



Scripture Union
Sabah



Scripture Union
Sarawak